

ELEMBO YA MIBALE



Mbote, baninga. Tótelema biso nyonso mwa moke mpo na kobondela, soki bokolinga.

² Tata na biso na Likoló, tosangani lisusu na liyangani ya lokumu oyo, na mpokwa oyo, na mosala na Nkolo. Mpe Olakaki ete bipai nyonso tokosangana elongo, ézala mibale to misato kati na biso, ete Okozala katikati na biso. Mpe tokoki kondimisama ete Ozali awa, mpamba te tosangani na Nkombo na Ye.

³ Sikawa tobondeli, Tata, ete—ete Óya na mpokwa oyo kobukela biso Elembo ya Mibale oyo. Mpe, ndenge mo—moyémbi alobaki, ete akosepela kotala na ngámbo mosusu ya ridó ya ntango. Yango nde mposa na biso, Nkolo, ezali kaka ya—ya kotala na ngámbo mosusu mpe komona oyo ezali liboso. Tobondeli ete Mwana-mpate oyo abomamáki áya katikati na biso sikawa mpe ábuka Elembo yango, mpe—mpe komonisa biso Yango, makambo oyo tozali na bosenga ya komona.

⁴ Bato mosusu bazali awa, Nkolo, oyo bakoti naino te na bondeko monene oyo, zingazinga na Klisto. Tobondeli ete, na mpokwa oyo, bázua mokano ya Seko wana, bátondisama na Molimo na Nzambe.

⁵ Soki babeli bazali, Tata, tobondeli ete Óbikisa bango. Miswále mingi ezali awa, natii maboko na ngai likoló na yango, na ekaniseli ya—ya Biblia, ya Santu Polo, wana bazalaki kozua miswále mpe bilamba oyo esilaki komama nzoto na ye. Milimo ya mbindo ezalaki kotika bato, mpe bazalaki kobikisama.

⁶ Tozali komona Boyei na Nkolo oyo ekómi pene. Toyebi ete ntango yango ezali kobeleva. Makambo oyo ezongi lisusu na Lingomba, nsima na mibu nkóto na nkama libwa.

⁷ Sikawa tobondeli, Tata, ete Ókokisa makambo oyo tosengi. Léndisa mosali na Yo, mpe sunga basali na Yo bisika nyonso, Nkolo, koleka mingi biso baoyo tosangani awa na mpokwa oyo, mpo tókoka koyamba Liloba. Tosengi yango na Nkombo na Yesu. Amen.

⁸ Ezali mpenza malamú koya lisusu na ndako ya Nkolo na mpokwa oyo. Mpe nayebi ete mingi kati na bino batelemi, bó—bólímisa ngai mpo na yango, kasi ezali mpenza mpasi mpo tókoka kosala koleka wana. To—tokómisi nda—ndakonzambe lokola . . . toyeisi yango monene mpo tókoka koyamba lisusu bato misato to minei, nkama misato to nkama minei na kati. Kasi mayangani ya libanda na momesano boye, e—ebéndaka bato mwa mingi koleka.

⁹ Sikawa, oh, nazali mpenza kolekisa ntango moko ya malamú mingi, na mabondeli mpe na koyekoláká bi—Bilembo oyo.

Nabanzi ete ezali mpe bongo mpo na bino nyonso. [Losambo balobi: “Amen.”—Mok.] Na—nandimisami ete ezali bongo. Soki Ezali na motuya mingi mpo na bino ndenge Ezali mpo na ngai, na ntembe te, ezali. . . bozali kolekisa ntango moko ya malamumu mingi. Mpe nazali na. . .

¹⁰ Nazali na mposa ya kobenga moninga na ngai ya mwasi, nsima na liyangani. Lelo ezali mokolo ya mbotama na ye. Akokisi mibu zomi na mibale lelo, Sara, mwana na ngai ya mwasi. Mpe na nsima, bongo, nsima na lobi, nasengeli kobenga lisusu, mpo ezali mokolo ya mbotama ya Becky.

¹¹ Sikawa, na mpokwa oyo, tozali koyekola Elembo ya Mibale oyo. Mpo na Bilembo minei ya liboso, babuti-mpunda bazali minei. Mpe nayebisi bino, lelo, likambo moko esalemaki lisusu. Mpe, na—na, likambo oyo na. . . Nakendeki kozua makambo ya kala oyo nakomáká, oyo nateyáká likoló na yango, kala mpenza, mpe nafandaki wana. Mpe namilobelaki: “Ee, na—nasáláki nyonso oyo nakokaki kosala.” Nazuaki mpe mikanda ya bakomi mingi ná nyonso wana, mpe namilobelaki: “Ee, nakotángá mwa moke, mpe nakotala yango mpo námona likambo *boye ná boye*.” Mpe na mbala moko boyebi, likambo moko esalemi, mpe ekeseni mpenza na mobimba. Eyi mpenza ndenge mosusu. Na bongo, namizueli crayon nokinoki, mpe nabandi kokoma na lombangu mpenza, wana Ye azali wana.

¹² Oh, likambo moko euti kosalema, eleki pene na ndambo ya ngonga mpenza. Nazalaki koyebisa yango na Ndeko Wood, ntango tozalaki koya, eleki kaka miníti moke. Likambo moko boye, boyebi. Boyebi, makambo mingi esalemaka, oyo okoki kolobela yango te, boyebi. Kasi likambo moko euti kosalema, oyo esungaki ngai mingi mpenza.

¹³ Nazali na moninga moko awa, esika moko, na kati ya ndako oyo. Na ntembe te, bino nyonso bozali baninga na ngai. Nde—ndeko oyo, ezali Ndeko Lee Vayle. Azali ndeko moko ya motuya, mpe moyekoli ya solosolo ya Makomi. Dr. Vayle azali Batiste oyo azali na Molimo Mosanto. Mpe azali. . . Nazoloba oyo te mpo na kosepelisa ye, nazali koloba yango mpo nandimaka yango. Nakanisi ete azali moko na bayekoli ya malamumu koleka, oyo nayebi, katikati na biso. Auti kokomela ngai mwa mokanda moko awa, atindelaki ngai yango na nzela ya Billy. Mpe Billy akokaki mpenza te kotángélela ngai yango. Mpe nakanisi. . . Nazongeli kotángá yango te, kasi nalingaki kaka koloba oyo ye alobaki awa. Mpe nauti kotángá yango, Ndeko Vayle, soki ozali awa. Nauti kotángá yango, eleki pene na sanza motoba.

¹⁴ “Nandimisami mpenza te,” alobaki bongo. “Ndeko Bill, nandimisami mpenza te, kasi nandimi ete Polycarpe azalaki moyekoli ya Santu Yoane.” Ezali mpenza bongo. Azalaki bongo. “Nakanisi ete Irené azalaki moyekoli ya—ya Polycarpe.” Ezali mpenza bongo, ya solo mpenza. “Irené alobaki: ‘Yesu akozonga—

akozonga ntango moponami ya nsuka ya Nzoto ya Klisto akokóta.”

¹⁵ Oyo wana ezalaki Irené, pene na mibu nkama minei na...nsima na liwa ya Klisto. Alobaki: “Ntango eleko ya nsuka ekoya...” Sikawa, ekomami na—na Likita Liboso na Nicée. Bino baoyo bozali awa, oyo botángaka ma—ma...oyo boyékolaka Makomi, mpe boyékolaka...nalingi koloba, baoyo boyékolaka histoire ya Biblia, bokomona yango na...na Likita Liboso na Nicée. Nakanisi ete ezali buku ya liboso to buku ya mibale, nde bo—bokomona yango kuna. Sikawa, amonaki yango, eleki mibu ebele, mpe alobaki: “Ntango moponami ya nsuka, oyo ya—ya nsuka, moponami wana.”

¹⁶ Bato bakanisaka ete koponama ezali kaka likambo oyo eúti—ete ezali kaka likambo oyo eúti kobótama awa, kala mingi te. Oh, la la! Ezali moko na malakisi ya kala koleka oyo tozali na yango: koponama mpe kobengama. Na boye Irené, na ntembe te, bayekoli ya solosolo ya Makomi, bandimaka ntango nyonso likambo ya koponama.

¹⁷ Na bongo, Irené azalaki moko na—na banje ya eleko ya lingomba, ndenge tomonaki, ndenge toyekolaki. Tondimaka yango. Na ntembe te, sikawa, nyonso wana ezalaki mabombami. Nyonso wana ezali awa, ya solo, ebombamaki awa, na Bilembo oyo, bomoni. Mpe esengeli komonisama na ntango ya nsuka. Ndenge ebandáki ná Polo, ná—ná Irené, ná Martin, mpe bongo na bongo, mpe ekiti téé kino na eleko ya nsuka.

¹⁸ Mpe, sikawa, totii motema sikawa, ete Nkolo akopambola biso na makasi na biso na mpokwa oyo. Sikawa tozali...Elembo ya Liboso, nasepelaki na yango mpenza. Elembo ya Liboso, mapamboli oyo etambolaki elongo ná Yango, mpo na ngai!

¹⁹ Sikawa, na—nalingi koumisa bino mingi te. Kasi, bomoni, na—nakokende lisusu sikawa, na mwa bampókwa, nsima na oyo kosila. Tosengeli konyokwama mwa moke, tóloba. Mpe nasepeli na... .

²⁰ Namoni Ndeko Junior Jackson ateleme kuna. Na...Mpe nakanisaki ete namonaki Ndeko Ruddell, kala mingi te, awa esika moko. Mpe bandeko ya balosambo ya bondeko na biso, oyo batiki bango báýá awa, ná bamosusu. Tosepeli na yango mpenza. Mpe namoni Ndeko Hooper, nabanzi, ateleme pembeni na etutu kuna, aúti na Utica, losambo ya kuna. Tosepeli mpenza na boyokani malamau na bino nyonso.

²¹ Sikawa, na mpokwa ya lobi eleki, ndenge tosepelaka ntango nyonso, ná malakisi likoló na—na Bilembo, tozali kolakisa yango lolenge moko ná—ná—na bileko ya lingomba. Mpe ntango tosilisaki ná malakisi ya eleko ya lingomba, mbala oyo eleki, ntango nayemaki yango awa na—na eteyelo, na etanda, bato boni bazali komikanisela likambo oyo esalemaki? Ye akitaki, mbala moko akendeke na etutu, kati na Pole, mpe ayemaki yango, Ye

moko, wana mpenza na etutu, liboso na biso nyonso. Mwanje na Nkolo atelemaki awa, liboso na bato nkama na nkama.

²² Sikawa Azali—Azali kosala likambo moko ya kokamwa mpenza, sikawa mpe, na boye tozali na elikia ete makambo ya minene ekosalema. Toyebi te . . . Bosepelaka mpenza kozela na—na elikia monene wana, toyebi mpenza te eloko nini ekosalema na nsima, boyebi, tozali kaka—kaka kozela. Sikawa, Nzambe azali monene mingi mpo na biso, mpe azali malamumu mingi! Tosepelaka na Ye mingi!

²³ Sikawa, molongo ya 1 ná ya 2, nakotángá Yango, mpo na kopesa mwa mobóko. Nsima na yango tokozua milongo ya 3 ná ya 4, mpo na Elembo ya Mibale. Nsima na yango, milongo ya 5 ná ya 6 ezali Elembo ya Misato. Mpe oyo ya 7 ná ya 8 ezali . . . Milongo mibale mpo na mobuti-mpunda moko na moko. Sikawa, nalingi ete bólanda malamumu ndenge bato yango . . . Likoló na mpunda ya lángi esangáná, ntango mosusu . . . Ekoya, ezali ntango nyonso kobongwana, wana ezali koya.

²⁴ Na nsima, Elembo monene wana ya nsuka esengeli kofungwama, soki Nzambe alingi, mokolo ya Lomingu ekoya na mpokwa! Oyo wana, ntango ekomaki, likambo bobele moko oyo esalemaki, “ezalaki kimia na Likoló, na ndambo ya ngonga.” Nzambe ásungá biso.

²⁵ Sikawa nakotángá molongo ya 3 sikawa.

Wana ekangolaki ye elembo ya mibale, nayokaki ejali-na-bomoi na mibale koloba ete, Yaka komona.

Mpunda mosusu ebimaki . . . (molongo ya 4) . . . ejalaki motane: nguya epesamaki na mofandi na yango ete álongola kimia na mokili, . . . ete bato bábomana . . . bábomana: mpe mopanga monene epesamaki na ye.

²⁶ Sikawa, libombami sikawa, ntango e—Ezali-na-bomoi eyebisaki Yoane: “Yaka nde komona.” Kasi amonaki te oyo yango ezalaki. Amonaki kaka elembetele moko. Mpe elembetele yango, ntina oyo yango . . . Alobaki: “Yaka komona,” kasi amonaki elembetele, asengelaki kotalisa yango na lingomba lokola elembetele, mpo básenzela; kino ntango eleko ya nsuka ekokoka, na ntango yango nde Elembo yango ekofungwama.

²⁷ Sikawa, moto nyonso asósoli yango sikawa, bomoni, Bilembo yango ekofungwama. Mpe bozali na esengo te ya kobika na mokolo oyo? Yango, bomoni, kaka yango te, baninga, kasi bómikanisela ntango nyonso, mokolo ya Lomingu eleki, na ntongo, ete mobimba na yango etiamaki likoló na komikitisa! Bomoni? Na pete, na kosokema, esalemaka na lolenge ete bato balekaka mpenza pembeni mpe bayebaka ata te ete ezali kosalema.

²⁸ Mpe, bóbósana te, tozali kozela Boyei ya Nkolo, ata na ntango nini. Mpe ntango biso . . . Nalobaki likambo moko, ete

ntango mosusu Konetolama ekosalema ndenge moko. Ekosila kosalema, esili, mpe moto moko te akoyeba likambo moko na ntina na yango. Ekosalema mpenza ndenge wana. Bomoni? Mpe na momesano . . . Bózonga na Biblia mobimba, mpe bótala yango ndenge esalemaka. Bomoni?

²⁹ Ata mpo na likambo monene lokola ya boyei ya Nkolo Yesu, moto moko te ayebaki likambo moko na ntina na yango. Bakanisaki: “Moto ya liboma wana, moto moko boye.” Mangomba elobaki: “Azali kaka fanatíki. Biso . . . Azali mpenza moto ya liboma.” Balobaki: “Azali elémá.” “Toyebi ete ozali elémá.” *Elémá* elingi koloba “liboma.” “Toyebi ete ozali na molimo mabe, yango nde epésá yo liboma. Bongo ozali koluka koteya biso malakisi? Nzokande, obotámá kuna, na ndenge ya bomakángo. Biso . . . Obotámá na pité. Ozali koluka kolakisa bato lokola biso, banganganzambe, ná bamosusu, ya tempelo?” Ee, oh la la, mpo na bango, ezalaki kotuka.

³⁰ Ntango Yoane ayaki, balobéláká na ntina na ye, kati na bileko nyonso, kobanda na Yisaya kino na Malaki. Elingi koloba mibu nkóto na nkama mibale . . . to nkama nsambo na zomi na mibale, basakoli bamonáká ye koya. Bato nyonso bazalaki kozela ye áya, kozeláká yango ata na ntango nini. Kasi ndenge ayaki, ateyaki mpe asalaki mosala na ye, mpe akendeki na Nkembo.

³¹ Kasi ata bantoma bayebaki yango te, mpo batunaki Ye. Balobaki: “Sikawa, soki—soki Mwana na moto azali kokende na Yelusaleme, makambo nyonso wana, mpo na kopesama mbeka,” balobaki, “mpo na nini Makomi elobi ete ‘Eliya akoya liboso’?”

³² Yesu alobaki: “Asilaki koya, kasi boyebaki yango te. Mpe asalaki mpenza makambo oyo Makomi elobaki ete akosala. Mpe basalaki na ye ndenge ekomamáká mpenza.” Bomoni? Kasi bakokaki kososola yango te. Alobaki: “Ezalaki Yoane.”

Mpe, na nsima: “Oh!” Bomoni, ba—balamukaki, na yango. Bango . . .

³³ Mpe ntango, ata, na nsuka, nsima na makambo nyonso oyo A—Asilaki kosala, ná bilembo oyo Asilaki kolakisa bango, mpe Asilaki ata kobenga bango. Alobaki: “Nani kati na bino akoki kokweisa Ngai na lisumu, kozanga kondima? Soki Nasalaki mpenza te makambo oyo Makomi elobaki ete Lotomo na Ngai ekosala ntango Nakoya na mokili, na bongo bólakisa Ngai epai Nasali lisumu. Bomoni? Na bongo Ngai nako—nakolakisa bino oyo bino bosengeli kozala, mpe tótala soki bondimi yango, to te.” Bomoni? Alingaki kozonga mbala moko mpe koloba: “Bino bosengelaki kondimela Ngai ntango Nayei.” Basalaki yango te, bomoni, boye bayebaki malamumu ete bakokaki kowelana ná Ye te na oyo wana. Kasi Alobaki: “Nani kati na bino akoki kofunda Ngai na ntina na kozanga kondima? Bomoni? Nasalaki mpenza te oyo esengelaki?”

34 Ata bantoma, nzelanzela, babetaki libaku. Toyebi ndenge Makomi elobi. Bongo na nsuka, sukasuka, balobaki: “Sikawa tondimi. Tondimi ete moto moko te asengeli koyebisa Yo likambo, mpo Oyebi makambo nyonso.”

35 Sikawa, nalingaki mpenza kosepela komona elongi na Ye. Na ntembe te, Atalaki bango mpe Alobaki: “Ee, sikawa bondimi? Sukasuka ekomeli bino.” Ee, esengelaki kozala bongo te, ntango mosusu, kino na ntango wana, bomoni. Kasi Nzambe atámbwisaka makambo nyonso ndenge esengeli, boyebi. Na—nalingaka Ye mpo na yango.

36 Kasi sikawa tozali kokanisa eleko na biso. Mpamba te, soki nabandi kolobela yango, tokokóta ata moke te na Bilembo oyo.

37 Sikawa, bómikanisela, nazali koyamba bosenga mingi mpo na kobondela mpo na babeli. Mpe nazali kobóndela mpo na . . . ntango nyonso, mpo na bosenga nyonso oyo nazali koyamba, ná miswále mpe nyonso wana. Soki tokoki kosilisa Bilembo yango, kino na Elembo ya nsuka, mokolo ya Lomongo na ntongo, biso . . . Soki ezali mokano na Nkolo, tokosepela kosala liyangani moko ya malamú ya lolenge ya kala ya kobondela mpo na babeli awa, boyebi, esika oyo tokozua ntongo mobimba mpo na kobondela mpo na babeli. Mpe na—nandimisami mpenza ete ekozala liyangani moko ya ndenge, ya kobondela mpo na babeli. Bomoni? Nazali kaka komiyoka bongo, bomoni. Na bongo, ya ndenge te, kasi ekoki komonana ndenge mpo na bamosusu, bomoni, yango nde nalingi koloba.

38 Sikawa, ngolu na Nzambe ezali mpenza monene, mpo na komonisa biso basekele na Ye na eleko oyo! Sikawa, biso nyonso tondimaka ete tozali kobika na mokolo ya nsuka. Tondimaka yango. Mpe bómikanisela, basekele yango esengelaki komonisama na ntango ya nsuka. Mpe Akomonisa Liloba na Ye, basekele na Ye ndenge nini? Biblia elobaki. Bokolinga kotánga esika Alobi yango? Tózua yango mpo tómona ndenge Amonisaka basekele na Ye.

39 Sikawa nalingi ete bótánga Amosa. Bózua Buku ya Amosa, nalingi ete bótánga na mokapo ya 3 ya Amosa, molongo ya 7. Malamú. Nakotánga mpe molongo ya 6.

Kelelo . . . ekobeta nde na mboka mpe bato bakojanga kobanga? mabe ekokweya na mboka, mpe Yawe asili kosala mosala te?

Solo Nkolo . . . akosala likambo te bobele ete akoyebisa basekele na ye epai na baombo na ye, bango basakoli.

40 Sikawa, na mikolo ya nsuka, tozali . . . Bayebisi biso liboso ékokisama ete mo—mosakoli moko akoya.

41 Sikawa, toyebi ete tosili kozua ya ndenge na ndenge. Sikawa, nasosoli, nsima na kotambwisa miso na mpokwa oyo ete, awa, na—nazali koloba epai bayekoli bafandi, mpe na—nakosepela

ete bósosola ngai. Mpe boyebi ete ba-bande oyo ekotambola mokili mobimba, bomoni, na mokili mobimba, tóloba. Mpe nakolinga ata moke te ete bókanisa ete nazali koluka kokótisa e—eyambweli moko boye ya bulangíti to mokóto ya Eliya. Makambo nyonso—nyonso wana, tosílá komona yango mingi. Kasi, boyebi, makambo nyonso wana ezali bobele kobongisa nzela mpo na likambo ya solosolo oyo ekoya, mpo na kopengwisa bato.

⁴² Boyebaki ete bakambi ya—ya lokuta bayaki, ba-masiya ya lokuta, liboso Klisto áya? Ezalaki te, te. . . Molakisi ya mokolo wana, molakisi ya nguya wana, Gamaliele, ntango mo—motuna etúnamaki soki basengelaki kobeta mibali wana, mpe nyonso wana, alobaki: “Bótika bango. Soki euti na Nzambe, ee, likama ezali ete bóbundisa Nzambe. Kasi soki euti na Nzambe te. . .” Alobaki: “Moto moko atelemaki, kala mingi te, mpe amemaki bato nkama minei na lisobe, mpe bongo na bongo? Makambo yango ezali kosalema.” Ezalaki nini? Nyonso wana ezalaki kobongisa nzela mpo na Eloko ya solosolo, ntango Ekoya.

⁴³ Sikawa, bomoni, Satana nde atindaka baoyo wana. Bótala mayele mabe ya moto yango, oyo tozali kolobela awa, Satana, ye oyo tozali kozipola polele awa; tozali mpenza kotika ye bolumbu, na nzela na Makomi, mpe kotika bino bómoma nani ye azali. Yango nde. . . nde esengeli kosalema.

⁴⁴ Mpe, bómikanisela, alukaki te komikómisa communiste, ye Satana. Azali motemeli-na-Klisto. “Ekozala mpenza pembeni, na lolenge ete,” Yesu alobaki, “ekokaki kopengwisa Baponami. . .” Mpe Bango nde babómbami na kati ya Bilembo oyo, baoyo bankombo na bango ekomami na Buku longwa na kozalisama ya mokili.

⁴⁵ Azali moto ya mayele mabe. Ntango amonaka likambo oyo koya, ezali koya, na bongo abwakaka nyonso oyo akoki kobwaka kuna, mpo na kobúlunganisa yango liboso ékóma wana. Boyebaki ete baklisto ya lokuta bakoya na mikolo ya nsuka? Esengeli koya mbala moko nsima na oyo, nsima na Nsango monene oyo ndeko oyo akoteya, oyo akoya mpenza, akopokolama na molimo ya Eliya, mbala moko.

⁴⁶ Mpe bakosala libunga mpo na ye. Bamosusu na bango bakokanisa ete azali Masiya. Kasi akoloba polele: “Te.” Mpamba te, esengeli kosalema ndenge esalemaki na Yoane.

⁴⁷ Na ntango ya Yoane Mobatisi, ntango abimaki kuna mpo na koteya, balobaki na ye: “Yo nde Masiya te? Yo ozali Ye te?”

⁴⁸ Alobaki: “Ngai nazali Ye te. Nabongi ata kofungola sapatu na Ye te. Kasi ngai na—nazali kobatisa bino na mai, kasi Ye Akobatisa na Molimo Mosanto.” Mpe Yoane andimisamaki mpenza ete Ye azalaki na mokili, alobaki: “Azali katikati na bino, esika moko boye, sikawa.”

⁴⁹ Kasi ayebaki Ye te, kino amónaki elembo wana kokita likoló na Ye. Na nsima, ntango amonaki Pole wana kokita mpe

kofungwama lokola ebenga, mpe kokita likoló na Ye, alobaki: “Ye wana. Ezali Ye.” Kasi Yoane nde azalaki bobele moko oyo amonaki Yango, boyebi. Yoane nde azalaki bobele moko oyo ayokaki Mongongo yango. Baoyo nyonso oyo bazalaki wana, moko te ayokaki Yango.

⁵⁰ Kasi, na bongo, ntango mosali ya solosolo akómaka; bomekoli nyonso oyo eyaka liboso na yango, ezalaka mpo na kotia mobulu na bongo ya bato. Satana nde asalaka yango. Mpe baoyo bakokaka te kosósola solo ná lokuta, babetaka libaku. Kasi Baponami bakosala yango te; Biblia elobi ete akozala na makoki ya kopengwisa Baponami te. Sikawa, liboso mpenza na Boyei ya Klisto, Biblia elobi: “Baklisto ya lokuta bakoya, mpe bakoloba ete bazali Klisto, mpe bakoloba: ‘Tala, bato balobi ete Azali na lisobe.’ Bóndima yango te. ‘Tala, Azali na chambre ya nkukú.’ Bóndima yango te.”

⁵¹ “Mpamba te, lokola moi engengaka longwa na esti kino na westi, Boyei ya Mwana na moto mpe ekozala bongo.” Bomoni? Iyo, Ako—Ako—Akomonana, mpe ekozala likambo ya mokili mobimba. Sikawa, eko, sikawa, na ntembe te, ntango bakomona ete likambo moko esalemi, bomoni, na ntango wana nde bako. . . Sikawa, bómikanisela, ekosalema mbala moko nsima na Lingomba kozonga na Ndako, nsima na Konétolama.

⁵² Sikawa bomekoli ya lokuta ekozala, ntango nyonso, mpe tozali na mposa moke te ya kosangana na eloko ya ndenge wana. Te, misie.

⁵³ Mpe nandimaka ete ntango moto yango akoya, ye oyo balobelaki liboso ete akoya, nazotalisa yango kaka na nzela na Makomi, ete moto yango akosengela kozala mosakoli. Na ntembe ata moke te akozala. Mpe emoniseli ya Nzambe, mpo Nzambe. . . Liloba ya Nkolo eyaka epai na basakoli na Ye. Ezali mpenza ya solo. Ezali. . . Mpe Nzambe akoki kobongwana te, bomoni. Soki Azalaki na esaleli ya malamumu koleka, Alingaki—Alingaki kosalela yango. Kasi A—Azali na. . . Aponaki esaleli ya malamumu koleka na ebandeli.

⁵⁴ Ndakisa, Akokaki kopona moi mpo éteya Nsango-malamumu. Akokaki kopona sanza. Akokaki kopona mo—mopepe. Kasi Aponaki moto. Mpe Atikala naino kopona bitóngá te. Moto moko na moko! Bomoni?

⁵⁵ Mpe basakoli minene mibale bazalaka na mokili na ntango moko te. Bomoni, moto nyonso azalaka ndenge mosusu, asálémá ndenge mosusu. Soki Nzambe akoki kozua moto moko kaka, yango nde nyonso oyo Asengelaka na yango, na loboko na Ye mpenza, Akoki kosala oyo Alingi. Asengelaka kozala na moto moko kaka. Na mikolo na Noa; na mikolo ya Eliya; na mikolo na Mose.

56 Bato mingi bayaki, na ntango ya Mose. Boyebi ndenge basalaki, mpe bazalaki koluka koloba: “Ee, ozali mosantu bobele yo moko te na kati ya etonga,” mpe—mpe Datana ná—ná Kora.

57 Mpe Nzambe alobaki: “Kabwana na bango. Nakofungola mabelé mpe ekomela bango.” Bomoni? Na—na bongo. . .

58 Na bongo bato bakómaki koyimayima. Alobaki: “Nako—Nakolongola kaka likambo yango mobimba.”

59 Mpe kuna, Mose azuaki esika ya Klisto, na ntango yango, amibwakaki na katikati, mpe alobaki: “Kosala yango te, Nkolo.” Bomoni? Mpe, na ntembe te, ye. . . Nsima na Ye kotia Mose na mosala yango, Atelemelaki Mose te, mpo azalaki kosala mosala ya Klisto na ntango yango. Ezalaki Klisto kati na Mose. Na ntembe te.

60 Sikawa, tozali na esengo mingi lelo, ete Nzambe azali komimonisa Ye moko epai na biso. Mpe nandimi ete Mokolo monene ebandi kotána, koya. Bapole ebandi kopelapela. Bandeke ya paradizo babandi koyemba na mitema ya basantu. Bayebi ete etikali lisusu ntango molai te sikawa. Likambo moko elingi kosalema, esengeli kosalema. Boye, soki “Asali eloko moko te. . .”

61 Sikawa, Makomi nyonso epesámá na mpemela. Makomi esengeli kozala Solo, na ntembe ata moke te. Nzela mosusu ezali te. Na esika wana nde nakesanaka ná baninga na biso ya lingomba Katoliko. Ngai nandimaka ete Ekomamaki te na bato lokola bato nyonso. Nandimaka ete Epémelamaki na Molimo Mosanto. Mpe makambo ya mike-mike nyonso oyo babakisaka, oyo balukaka kobakisa likoló na Yango; bomonaki yango, na nsuka ya likambo, nyonso wana eboyamaki.

62 Mpe Makomi oyo, oyo ya solosolo, etambolaka mpenza elongo, moko na mosusu, na lolenge ete e—etelemelanaka te, esika moko te ata moke te. Bólakisa ngai mokanda moko kaka oyo ekoki—oyo bakoki kokoma molongo moko, tóloba, kozanga komitelemelana, to oyo bakomi—bakomi molongo moko, to mibale. Kasi Biblia emitelamelaka Yango moko te, ata esika moko te. Nayóká batélemeli koloba bongo, kasi nayebisaka bango banda kala, bálakisa ngai epai wapi yango ezali. Awa na kati, ezali te. Ezali kaka mpo likanisi ya moto ezalaka ya kobulungana. Nzambe azali na mobulungano te. Ayebi oyo Azosala. Ayebi.

63 Bótala, soki Nzambe akosambisa mokili na lingomba moko, ndenge lingomba Katoliko elobaka, malamumu, na bongo, ezali lingomba nini? Bótala kaka mangomba oyo tozali na yango. Tozali na bibongiseli ya mangomba ndenge na ndenge koleka nkama libwa. Sikawa ndenge nini. . . Moko eteyaka lolenge *oyo*, mpe mosusu lolenge *wana*. Mobulu mpenza, na bongo, moto nyonso asalaka oyo alingi, bokokoba kaka ndenge wana. Nzambe asengeli kozala na emekeli moko, mpe yango ezali Liloba na Ye.

64 Nazalaki kosolola... Ezali te kopamela ba-Katoliko, sikawa, mpo ba—ba-Protestant mpe bazali mabe ndenge moko. Kasi nazalaki kosolola na sángo moko, alobaki: “M. Branham,” alobaki, “Nzambe azali kati na lingomba na Ye.”

65 Nalobaki: “Misie, Nzambe azali kati na Liloba na Ye. Mpe Ye azali Liloba.” Iyo, mesie.

Alobaki: “Ee, Azali kati na . . . Lingomba ekweyaka te.”

66 Nalobaki: “Alobi bongo te. Kasi Alobaki ete Liloba nde ekweyaka te.”

67 Alobaki: “Ee, tozaláká kolakisa libatisi yango ndenge wana, mpe bongo na bongo.”

Nalobaki: “Na ntango nini?”

Alobaki: “Kalakala, kuna na ebandeli.”

Nalobaki: “Olobi ete yango nde ezalaki lingomba Katoliko?”

Alobaki: “Iyo.”

68 Nalobaki: “Boye, ngai nazali Mokatoliko, Mokatoliko ya lolenge ya kala. Nandimaka lolenge ya kala. Bino lelo, bobulunganisi Yango na mobimba, mpe bolakisaka mpenza eloko moko te, oyo ezali kati na Makomi. Kosala libondeli ya basi ná bato bakúfá, ná makambo mosusu nyonso wana, mpe, oh, la la, ekila ya kolia mosuni, ná, oh, nayebi te eloko nini lisusu, omoni.” Nalobaki: “Lukela ngai yango na Makomi.”

69 Alobaki: “Ezali na ntina ya kozala kuna te. Na ntango nionso oyo lingomba elobi bongo, ezali bongo. Ezali kosala bokeseni moko te oyo Yango elobi, ezali lingomba nde.”

70 Nalobaki: “Biblia elobaki ete: ‘Ye oyo akobakisa liloba moko likoló na Yango, to akolongola Moko, eteni na ye ekolongolama na Buku ya Bomoi.’ Boye, ezali Liloba nde! Ngai nandimaka Liloba.”

71 Sikawa, na bongo, soki Amosa alobi, mpe Makomi mosusu elobi ndenge moko, ete soki . . .

72 Mpe bóbosana te, awa, tokolobela kaka makambo na Yango ya minene. Kaka, oh, la la, soki . . . Na ntango nakóti na chambre wana, mpe—mpe Epakweli wana eyei, soki nakokaki kokoma makambo oyo Ye . . . makambo nyonso oyo esalemaka, nakotikala awa sanza misato mpo na kolobela moko na Bilembo yango. Boye, tózua kaka bisika yango mpo na kolobela Yango, kaka oyo ekozala lokola ekokanga bato mpema te. Kasi, ata bongo, ezali mpenza mpo na kosala bango mpasi te, kasi kaka mpo, na kondimáká ete, eko—ekopesa eloko yango elengi. Boyebi oyo nalingi koloba.

73 Sikawa, bóyoka malamú likambo oyo sikawa, soki “Nzambe asalaka likambo moko te,” elobaki Amosa, “kino yambo Ámonisa yango epai ya basali na Ye basakoli.” Mpe, na bongo, tozali komona oyo Azali kosala. Na ntembe te, Alingi kosala

likambo moko, eloko oyo Azali komonisa sikawa. Nzambe alingi kobanda mosala, ya kosambisa, nandimi. Alingi kosala likambo moko. Mpe likambo moko lisusu, ezali mpenza kotatola mpenzampenja ete, tokómi na mikolo ya nsuka. Tokómi na nsuka ya eleko, Eleko ya Lingomba ya Laodikia, mpo makambo oyo esengelaki komonisama bobele na mokolo ya nsuka.

⁷⁴ Sika, bókánisa yango naino sikawa. Tó—tómeka kokotisa na bozindo eloko oyo tondimi ete Molimo Mosanto alingi koyebisa biso.

⁷⁵ Sikawa bómikanisela: “Eloko moko te ekomonisama; Nzambe akosala ata eloko moko te, kino liboso Ámonisa yango na basali na Ye basakoli.” Mpe liboso Ásala likambo moko, Amonisaka yango. Mpe ntango Amonisi yango, bokoki komikanisela likambo oyo, eloko moko ezali na nzela. Bomoni, ezali komonisama.

⁷⁶ Mpe makambo oyo tozali kolobela, esengelaki komónisama na ntango ya nsuka, liboso na Kelelo ya nsuka mpenza, na nsuka ya Nsango ya eleko ya lingomba ya nsuka. Ezali solo. Soki bolingi kotanga yango sikawa, bokoki kozua. . . Bino, nautaki kolobela bino yango, lobi na mpokwa, mbala misato, Emoniseli 10:1-7, bomoni. “Na mikolo oyo Nsango ya mwanje na nsambo ekoyula, libombami ya Nzambe ekomonisama mpe ekosila.” Etikali bobele likambo moko. Ntango Buku oyo ekangamaki na Bilembo ekofungwama, na ntango wana libombami mobimba ya Nzambe. . .

⁷⁷ Ee, tolukáki koyeba Yango, na boumeli ya bambula. Mpe kokokana na Makomi, na bongo, biso. . . Nzela ya kososola Yango ezalaki te, kino na mokolo oyo, mpo Ezalaki ya kobómbama. Tomonaki elembetele yango, oyo Yango ezalaki kotalisa, kasi Ekokaki komonisama ndenge esengeli te, kino na mokolo ya nsuka. Bomoni? Sikawa, na bongo, tosengeli kozala wana, na—na ntango ya nsuka.

⁷⁸ Sikawa, bómikanisela. Ezali te. . . Mpe bóbosana te sikawa, ete: “Asalaka eloko moko te, kino Ámonisa yango.” Bóbosana mpe te ete Asalaka yango na ndenge ya komikitisa mpenza, ete: “Bato ya bwanya ná ya mayele bazángaka yango.” Sikawa, soki bolingi kokoma yango, ezali Matai 11:25-26. Mpe, bómikanisela: “Asalaka eloko moko te, kino Ámonisa yango.” Mpe Amonisaka yango na lolenge ete bato ya mayele mingi, baoyo batángá mingi, bazángaka yango. Bómikanisela, mokili ezalaki nde na mposa ya bwanya, na esika ya Liloba, ntango lisumu ya liboso esalaki oyo esalaki. Bobosana yango te sikawa. Oh, tosengelaki kozóngisa matondo mingi, soki tokanisi yango!

⁷⁹ Sikawa bótala makambo oyo ezali kosalema! Bótala makambo oyo Ayebisaki biso! Bótala awa, na tabernacle oyo, bino baoyo tokóli awa elongo ná bino. Sikawa nakosenga ete ba-bande. . . Ee, bókoba kotia yango na bande. Kasi, bótala,

nakoloba likambo oyo na bato ya tabernacle, bino baoyo boyaka awa. Nabeti mondenge na moto nyonso kati na bino, na Nkombo na Nkolo Yesu, ete átia mosapi na likambo moko mpamba, kati na makambo nkama na nkama oyo elobámá liboso ékokisama, mpe áloba ete ekokisámáki te. Bóyebisa ngai mbala moko mpamba, na etumbelo oyo, to ézala esika nini, oyo Atikálá koloba likambo moko oyo ekokisamaki na kobonga be te kaka ndenge elobamaki liboso. Ndenge nini? Likanisi ya moto ekoki kozala bongo? Ata moke te.

⁸⁰ Ntango Amonanaki kuna na ebale, ekokokisa mibu ntuku misato na misato na sanza ya motoba oyo ekoya, na lolenge ya Pole! Bino bato ya kala bozali komikanisela ete nayebisaki bino, uta bomwana na ngai, likambo ya Mongongo wana ná Pole wana. Kasi bato bazalaki kokanisa ete motó na ngai ezalaki kosala mpenza malamumu te. Na ntembe te, ntango mosusu, ngai mpe nalingaki kokanisa ndenge moko, soki moto moko álobaka yango. Kasi sikawa bozali na ntina ya komitunatuna te, na ntina na Yango sikawa. Mpe Lingomba emitunatunaka lisusu te, uta mobu 1933, kuna na ebale, mokolo wana, epai nazalaki kobatisa bato nkama na nkama!

⁸¹ Nazali komikanisela elenge mobali Marra oyo ayebisáká ngai, koloba ete: “Ozali kokende kuna mpo na komelisa bato wana mwa kopo ya mai, Billy?” Elenge Jim Marra ya awa, nakanisi ete asilá kokufa. Nakanisi ete babomaki ye kuna; mwasi moko abetaki ye masasi. Kasi a—atunaki ngai: “Ozali kokende kuna mpo na komelisa bato wana mwa kopo ya mai?”

⁸² Nalobaki: “Te, misie. Nazokende kobatisa bango na Nkombo na Nkolo na biso Yesu.”

⁸³ Mpe mwasi moko azalaki wana, azalaki elongo ná lisanga yango. Alobaki na mwasi mosusu, alobaki. . . alobaki likambo moko na ntina na yango. Alobaki: “Ee, ngai ekotungisa na yango ngai te, bamelisa ngai mwa kopo ya mai.” Alobaki: “Ezali mabe te. Etali ngai te.”

⁸⁴ Nalobaki: “Zóngá mpe kende kobongola motema. Obongi naino te mpo na kobatisama na Nkombo na Yesu Klisto.” Bomoni?

⁸⁵ Oyo ezali likambo ya kosakana na yango te. Ezali Nsango-malamumu ya Klisto, oyo emonisami na nzela ya etindá, Liloba. Sikawa, soki olobi: “Bozóba mpe bolémá,” okokaki koloba yango mpo na likambo mosusu. Kasi, kobosana te ete elakámá na kati ya Liloba ete likambo oyo ekosalema, mpe kaka mpenza oyo yango ekozala. Mpe yango oyo.

⁸⁶ Na bongo, kuna, mokolo yango, wana batelemaki na ebale! Mpe Mwanje na Nkolo, oyo nayebisaki bino ete Azalaki lokola mo—monzoto to eloko moko, na mosika, na bongo Epusanaki pene, mpe nayebisaki bino ete ezalaki lokola Pole ya lángi ya

mwa mai ya mpondu. Mpe Eyaki, kuna na ebale, epai nazalaki kobatisa.

⁸⁷ Na ntango yango, bato ya mombongo ya engumba balobaki: “Elingaki kolakisa nini?”

⁸⁸ Nalobaki: “Ezalaki mpo na ngai te. Ezalaki nde mpo na bino. Ngai nandimaka. Bomoni? Ezalaki mpo na bino, nde Nzambe asalaki bongo, mpo na koyebisa bino ete nazoyebisa bino Solo.” Lokola nazalaki mwana moke, mwana, tóloba, nazalaki na mibu pene na ntuku mibale na moko, ba—balingaki kondima yango te, bomoni, mpo elóngobanaki mpenza te mpo na mwana moke. Na bongo, nazalaki kokanisa. . .

⁸⁹ Ndeko Roberson awa, moko na bayangeli misolo na biso, namonaki ye awa eleki mwa miniti. Azalaki koyebisa ngai, mokolo wana, ete azalaki na Houston, ntango bakangaki fotó oyo bozali komona kuna. Mpe nazalaki. . . Na kowelana wana, nalandaki koloba likambo moko na ntina na yango, na mpokwa mosusu wana. Kaka Ndeko Roy nde azalaki. . . ná moto mosusu, kaka ye moko, kati na lisanga, nde azalaki na magnétophone. Ezalaki moko na ba-magnétophone ya kala, oyo ezalaki na singa. Namoni Ndeko Roberson sikawa, ná mwasi na ye. Boye, na—na bongo, Mme Roberson azalaki kobéla.

⁹⁰ Ndeko Roy azalaki sodá ya kala. Makolo na ye ezuaki masasi, mpe basundolaki ye mpo bakanisaki ete akufi. Azalaki mokonzi ya basodá na—na Mampinga. Bondóki 88 ya ba-Allemand ebetáká likalo oyo ye azalaki na kati, mpe elingaki mpenza koboma ye, mpe epanzaki ye kopanza. Basundolaki ye, mpo na ntango molai, bakanisaki ete akufi. Mpe balobáká ete akotamboláká lisusu te, mpo makolo na ye nyonso mibale epanzanaki mpenza, misisa na yango, ná nyonso wana. Oh, la la, akoki kotambola kutu malamumu koleka ngai.

⁹¹ Kasi ezalaki nini? Amonaki eloko moko, mpe akendeki na Houston. Mpe azalaki kosolola ná ngai na ntina na mwasi na ye. Mpe azali na—azali na singa yango; akotia yango na bande. Mpe ntango mayangani oyo ekosila, ee, akobeta yango mpo na bino nyonso, nazolikya. Na bande ya kala, oyo ya singa, azali na mayangani oyo nasalaki na Houston. Na bongo, alobaki ete mwasi na ye azali na yango kuna, mpe atikalá koyeba yango te kino mokolo mosusu wana.

⁹² Ye mwasi azalaki, oh, azalaki mpenza na mawa. Azalaki kobela, mpe azalaki na mposa ya kokóta na molongo ya mabondeli. Bayebáká ngai ata moke te, ngai mpe natikalá komona bango naino te na bomoi na ngai. Boye, mwasi na ye afandaki pembeni na—na lininisa mokolo yango, kotaláká libanda, na mawa makasi, boyebi, ná komitungisa, mpe azalaki na mposa ya kozua kálati ya mabondeli mpo ákota na molongo.

⁹³ Mpe, esalemaki ete, na mpokwa yango, akótaki na molongo, to na mpokwa oyo elandaki, to eloko moko ya ndenge wana.

Nabanzi, na mpokwa yango kaka. Mpe akotaki na molongo. Mpe ntango amataki na etumbelo, Molimo Mosanto ayebisaki ye, alobaki: “Sikawa, ofandaka awa te. Outi na engumba moko, nkombo na yango New Albany.” Mpe Alobaki: “Ofandaki pembeni na lininisa lelo, kotaláká libanda, mpe ozalaki komitungisa na ntina na kozua kálati ya mabondeli.” Ezali kuna, na bande, eleki mibu ebele.

⁹⁴ Na nsima, na ebandeli ya liyangani, ntango Molimo Mosanto azalaki wana . . . Ezalaki moko na mayangani ya liboso. Tozalaki kaka na bato pene na nkóto misato, na nsima, tokómaki na bato nkóto mwambe, na nsima, tokómaki na bato pene na nkóto ntuku misato. Na bongo kati na . . . Wana nazalaki koloba na . . . Moko na mayangani ya liboso mpenza, nalobaki: “Nayebi te mpo na nini nazali koloba likambo oyo.” Sikawa, ezali na bande. “Kasi, ezali, tozali . . . Oyo ekozala moko na makambo ya minene ya ntango na ngai. Likambo moko ekosalema na liyangani oyo, ekozala monene koleka nyonso oyo bato basilá komona.”

⁹⁵ Mpe ezalaki kaka bampokwa mwambe to libwa, to zomi, nsima na yango, ntango Mwanje na Nkolo amonanaki liboso na bato nkóto ntuku misato, akitaki, mpe bakangaki fotó. Tala Yango wana, sikawa, ebatelami na droit d’auteur na Washington, DC, lokola Ezàli ya koleka-bomoto bobele moko, oyo basilá kokanga fotó, na mokili mobimba.

⁹⁶ Na nsima nalobelaki yango, boyebi, nalobaki ete mbala mosusu, na ntango ya lisosoli, nalobaka: “Moto moko azipami na elilingi ya liwa. Azipami na elilingi moko, lokola ekoti ya moindo. Azali pene na liwa.”

⁹⁷ Na bongo awa na East Pines, to na Southern Pines, nabanzi, ntango nazalaki kuna, na liyangani ya nsuka. Mama moke moko afandaki wana, mpe Eloko moko eyebisaki ye: “Zwá fotó yango, nokinoki,” wana ngai nazalaki koloba na mwasi moko. Mpe ezalaki wana. Nakanisi ekotiama na etánda ya mayebisi; basili kotia yango, eleki mwa ntango. Ezibo moko ya moindo ezali likoló na mwasi yango.

⁹⁸ Akangaki fotó mosusu, kaka ntango Molimo Mosanto alobaki bongo. Elimwaki. Nalobaki: “Okobika. Nkolo abikisi yo. Cancer yango elimwe.” Mpe ekokisamaki. Abikisamaki. Bomoni? Yango mpenza. Bomoni?

⁹⁹ Elakisaka bobele ete Nzambe ayebi ntango ya mokolo oyo ekómi sikawa. Bisó Toyebi te. Tosengeli bobele kotosa Ye.

¹⁰⁰ Sikawa tokoki kokoba koloba, kasi tózonga awa mwa moke sikawa, mpo na kolobela Elembo oyo, mpo tókoka kolandisa oyo ná Yango. Sikawa, tokozonga mwa mok- . . . mwa moke na nsima, na—na oyo mosusu, na Elembo ya Liboso.

¹⁰¹ Tomoni, na bofungwami ya Elembo ya Liboso, Satana azali na—na moto moko, mosambeli monene mpenza. Bomonaki mobuti-mpunda ya mpembe wana? Oyo, bango, bazalaki

kokanisa ete yango ezalaki e...Lingomba ya ebandeli oyo ezalaki kokende liboso; kasi, oh, la la, yango nde elakisamaki kati na mibu ebele, kasi ekokaki kozala yango te. Bótala malamumu ntango tokomona oyo misusu, ntango tokosangisa nyonso wana elongo, nde bokoyeba esika yango ekomi, bomoni. Sikawa, nayebi naino te baoyo etikali soki ekozala ndenge nini. Kasi nayebi ete esengeli kolóngobana malamumu be mpenza, mpo ezali Solo. Ezali Solo. Oyo wana ezalaki mpenza bokitani ya lingomba ya Roma.

¹⁰² Bato oyo bakanisaka ete Bayuda bazali batelemeli-na-Klisto, bazali mpenza libanda na molongo na bamilio ya kilometre. Bókansaka ata moke te ete Bayuda bazali batelemeli-na-klisto. Miso na bango ebomamáki na ntina moko ete biso tókoka kozua nzela ya kokóta, mpo na kopesa biso ntango ya kobóngola motema.

¹⁰³ Kasi motemeli-na-Klisto azali moto ya Mabota. Ya solo mpenza. Azali momekali ya Solo; *motemeli*, “kotelemela.” Sikawa, elombe monene oyo, oh, akómaki mpenza moto monene, nsima—nsima na yango, sukasuka, atiamaki na ngwende. Na bongo, nsima na kotiana na ngwende, apesamaki motolé. Sikawa, ye, nsima na yango, bakúmbamelaki ye, na esika ya Nzambe.

¹⁰⁴ Sikawa, bótala, liboso yango étikala kosalema. Nalingi kotuna bino likambo moko. Wana ezalaki nani? Nini ezalaki likoló na Polo, na Batesaloniki ya Mibale 2:3, oyo elobaki ete moto yango akoya? Mpo na nini moto yango abwakaki miso kati na bileko mpe amonaki yango? Azalaki mosakoli ya Nzambe. Ya solo. Mpo na nini . . .

¹⁰⁵ Alobaki: “Molimo elobi polele ete na mikolo ya nsuka, bakotika kondima, mpe bakokangama na milimo ya kozimbisa . . .” Boyebi oyo *kozimbisa* ezali. Molimo ya kozimbisa kati na lingomba, ezali bakambi ya lingomba. “Molimo ya kozimbisa, ya bakambi ya lingomba, misala ya milimo mabe; bokósi na kati ya lingomba.”

¹⁰⁶ “Bato na nkó, bavímbi na lolendo,” bato ya bwanya, bomoni, ya mayele mingi, ya mayele ya bongó; “bazali na lolenge ya kosambela.” (Kokende bobele koloba: “Ee, tozali Baklisto; to sengeli kokende na losambo.”) “Bazali na lolenge ya kosambela, kasi bawanganaka bimoniseli, Nguya ná misala ya Molimo; zalá mosika na baoyo wana.” Bomoni? Sikawa bótala, alobaki: “Mpamba te ezali baoyo nde bakendeke ndako na ndako, mpe bakambaka basi ya zoba . . .” Elingi koloba te basi oyo bazali na Molimo Mosanto. “Basi ya zoba, oyo bakambamaka na bamposa mabe ya ndenge na ndenge.”

¹⁰⁷ Bamposa mabe ya ndenge na ndenge! Balingaka kokóta na makambo mikemike nyonso oyo bakoki kokóta na yango, ná makita ya ndenge na ndenge; mpe kobika ndenge nyonso oyo

balingi, kasi ata bongo, balobaka: “Tosambelaka. Tozali na biso malamumu lokola bato nyonso.” Bakendeke na mabina, na ba-féti, bakátaka suki, bapakolakapakola, balátaka ndenge balingi; kasi balobaka: “Tozali—tozali ba-Pantekotiste. Tozali—tozali na biso malamumu lokola bato nyonso.” Oh! misala na bino moko efundaka bino. Solo. Bótala.

¹⁰⁸ Kasi alobaki: “Bato na makanisi mapengwi, na oyo etali Solo.” Solo ezali nini? Liloba, elingi koloba Klisto. “Na oyo etali Solo.”

¹⁰⁹ “Oh, osalaka . . . Yo, ozali mopameli ya basi. Ozali moyini ya basi. Osalaka *oyo, oyo wana.*”

¹¹⁰ Te, mesie. Ezali bongo te. Wana ezali lo—lokuta. Ngai nayinaka basi te. Te, misie. Bazali bandeko na ngai ya basi, soki bazali bandeko basi. Kasi likambo oyo ngai . . .

¹¹¹ Bolingo esémbolaka. Soki esémboli te, ezali bolingo te. Soki ezali yango, na bongo, soki ezali bolingo, ezali—ezali bolingo phileo, kasi agapao te, nayebisi bino yango. Bakoki kozala na mwa bolingo phileo mpo na mwasi oyo azali kitoko na elongi. Kasi bolingo agapao ezali eloko mosusu, ezali bolingo oyo esémbolaka likambo, mpe esalaka ete tókutana ná Nzambe kuna na esika oyo tokoki kobika Seko na Seko. Bomoni? Nalingaki koloba yango te, ntango mosusu, ndenge eyokanaki, kasi ngai . . . Boyebi oyo na—na . . . Nazolikya ete bosósoli. Malamumu.

¹¹² Sikawa, kasi, bómikanisela, alobaki: “Ndenge Yane ná Yambele batélemelaki Mose, bango mpe bakosala bongo. Kasi nokinoki, boléma na bango etalisamaki polele.”

¹¹³ Mpo na nini? Na ntango oyo Mose azuaki etinda ya kosala likambo oyo emonanaki lokola makasi mpenza, kasi, akendeke kuna na bosembo nyonso mpenza. Mpe Nzambe ayebisaki na ye ete ázua lingenda wana mpe ábwaka yango na nsé, mpe ekobóngwana nyoka. Na bongo, Asalaki yango mpo na kolakisa ye eloko oyo ekosalema. Mpe liboso na Fálo, atelemaki wana kaka ndenge Nzambe apesáká ye etinda, mpe abwakaki lingenda na ye na nsé, mpe ebongwanaki nyoka.

¹¹⁴ Mpe na ntembe te, Fálo alobaki: “Ezali kisolóka ya pete!” Na bongo, akei kozua Yane ná Yambele na ye. Alobaki: “Biso mpe tokoki kosala makambo yango.” Mpe babwákaki mángenda na bango na nsé, mpe ekómaki banyoka.

Sikawa, Mose akokaki kosala nini?

¹¹⁵ Ezalaki nini? Ezalaki kotalisa ete eloko nyonso oyo ya Nzambe mpenza, zabolo azali na momekali moko mpo na yango. Bamekolaka, mpo na kobimisa bato libanda na nzela.

¹¹⁶ Mose asalaki nini, alobaki: “Ee, nabanzi nasalaki libunga. Malamumu názonga na ngai?” Atelemaki kaka kimia, mpo asilaki kokokisa etinda na ye na mobimba.

117 Na bongo, na mbala moko, nyoka ya Mose emelaki oyo mosusu. Bomoni? Botikalá komituna eloko nini ekómelaki nyoka wana mosusu? Ekendeki wapi? Mose alokotaki lingenda yango mpe akendeki ná yango. Asalaki na yango bikamwa. Mpe nyoka wana ezalaki na kati ya lingenda oyo mosusu. Bomoni? Ezali kitoko mingi. Boye te? Iyo, mesie.

118 Sikawa, motemeli-na-Klisto abandi komónisama polele, mokemoke. Nalingi ete bótala likambo oyo. Sikawa, soki boyoki. . .

119 Sikawa, mpo na baninga na ngai ba-Katoliko, bófanda naino kimia mwa moke, sikawa; nsima na yango tokomona esika ya ba-Protestant; epai biso nyonso tozali, bomoni.

120 Bótala, lingomba ya liboso, ntango lingomba Katoliko elobaka ete bango nde lingomba ya liboso, ya ebandeli, balobaka mpenza solo. Bazali yango. Babandaki na Pantekote. Kuna nde epai lingomba Katoliko ebandaki. Sikawa, kalakala, nazaláká mpenza kondima yango te, kino ntango natángaki histoire, mpe namonaki ete ezali solo. Babandaki na Pantekote. Kasi babandaki kobima libanda na nzela, mpe bomoni esika oyo bakómi.

121 Soki Pantekote ekobi kobima libanda na lombangu oyo ezali kobima na yango sikawa, bakozala na ntina ya koumela mibu nkóto mibale te. Nsima na mibu mokama, kobanda sikawa, bakokóma mosika koleka lingomba Katoliko. Ezali ya solo.

122 Kasi bótala, ndakisa, mobuti-mpunda ya mpembe oyo. Sikawa, tozali kaka kotia mobóko, mwa moke, kino ntango tokokóma na Elembo oyo. Sikawa, bótala mobuti-mpunda ya mpembe, ntango abimaki, a—asali mosala na bitape misato. Zabolo, ndenge natalisaki bino yango polele na mpokwa mosusu wana, azalaka kati na bosato, kaka lokola Nzambe. Kasi ezali zabolo moko wana ntango nyonso, na bitape misato. Bótala bitape na ye. Na étápe ya liboso, ayaki na. . .

123 Molimo Mosanto akitaki, mpe bato bazalaki kotia biloko nyonso esika moko. Mpe Molimo ya Nzambe ezalaki likoló na bango. Mpe bantoma bazalaki kotambola ndako na ndako, kokaboláká lipa elongo ná bato. Mpe bilembo minene ná bikamwa ezalaki kosalema.

124 Na—na nsima, likambo ya liboso boyebi, Satana abandaki kokótisa nungúnungú.

125 Bongo, nsima na mwa ntango, baombo ná babola ya mboka, oyo basilaki koyamba Molimo Mosanto, bakendeki kotatola na bisika ndenge na ndenge. Batatolaki epai ya bankolo na bango.

126 Mpe nsima na mwa ntango, babandaki koya, oh, ndakisa bakapiténe ya mapinga ná—ná bato ndenge na ndenge. Bato ya lokumu babandaki komona bolamu na bango, ná bikamwa

mpe bilembo oyo bato yango bazalaki kosala, boye bayambaki Boklisto.

¹²⁷ Ee, na bongo, bomoni, ntango ayambaki Boklisto, mpe akendeki kuna, na esika oyo bazalaki kosangana, na kati ya mwa ndako moko ya molili oyo etónda na putulu; mpe kobetáká maboko, koganga, kolobáká minoko na sika, mpe kozuáká bansango. Ee, akokaki ata moke te komema yango epai ya—ya moninga na ye, to moto mosusu, na mombongo na ye. “Akondima Yango ata moke te, ndenge wana.” Na ntembe te. Na bongo, asengeli kobongisa Yango. Na bongo babandaki kosangana, mpe bakómaki kokanisa: “Sikawa tokosala eloko moko ya mwa kokesana moke.”

¹²⁸ Mpe Yesu, na mbala moko, na eleko ya lingomba ya liboso, Ayebisaki bango. Awa, na mokapo ya 2 ya Emoniseli: “Natelemeli yo na likambo moko, na ntina na misala oyo ya Banikolaiti.”

¹²⁹ *Nikao*, “kokonza” bandimi. Na elobeli mosusu, balingi kosala, na esika ete bato nyonso bázala moko, bango balingi kokómisa moto moko mosantu. Balingaki kosala lolenge moko ya . . . Balingaki kozua ndakisa ya bopakano, epai wapi bautaki, mpe sukasuka basalaki yango.

¹³⁰ Sikawa bótala malamumu. Liboso, “Banikolaiti.” *Banikolaiti*, na Biblia, bazalaki kobenga yango “motemeli-na-Klisto,” mpo ezalaki kotelemela Mateyo ya ebandeli ya Klisto mpe bantoma.

¹³¹ Naboi kotángá nkombo ya moto yango. Azali moto monene. Kasi nazalaki na liyangani na ye, awa eleki mwa mibu. Mpe ayebaki ete ngai nazalaki wana, mpo nautaki kopesa ye mbote ya loboko. Mpe alobaki: “Oh, boyebi, tozali na bato mosusu lelo, oyo babengaka ba-Pantekotiste.” Mpe alobaki: “Bango batiaka motema na Buku ya Misala.” Mpe alobaki: “Bomoni, Misala ezalaki bobele mosala ya botango mpo na Lingomba.”

¹³² Bokoki kokanisa, moto oyo ayekolaki Biblia, mobange moko ya mpiko, oyo ayekolaki Biblia lokola mobali wana, mpe na nsima, áloba likambo ya ndenge wana? Eyokanaki, e . . . E—ezali ata koyokana lokola Molimo Mosanto te. Ee, esengeli kozala bongo te, esika moko te.

¹³³ Mpamba te, moto nyonso oyo azali na lisósoli mpenza akoyeba ete Misala ya Bantoma ezalaki misala ya bantoma te. Ezalaki misala ya Molimo Mosanto na kati ya bantoma. Boyebi ete toyemaki yango na bileko ya lingomba, boye te? Bizáli-na-bomoi oyo bafandi wana, bazali kosenzela likoló na Sanduku yango kuna. Matai, Malako, Luka, ná Yoane, batelemi wana, kosenzeláká likoló na Yango. Mpe na kati Kuna, ezali na makambo oyo esalemaki, lokola mbano ya mikanda ya Matai, Malako, Luka, ná Yoane.

¹³⁴ Yango nde eloko oyo nzete ebotaki . . . ebimisaki etape na yango ya liboso, mpe yango nde esalemaki. Mpe soki nzete yango

ebimisi etape mosusu, bakokoma Buku mosusu ya Misala nsima na yango. Mpamba te, bomoni, Bomoi yango moko esengeli kozala lisusu na kati ya eloko yango moko.

¹³⁵ Boye sikawa, lelo, ntango totalaka mangomba na biso ya ba-denomination, ba-Metodiste, ba-Batiste, ba-Presbytérien, ba-Lutherien, Eglise du Christ (ya maloba), ná ba-Pantekotiste mpe bamosusu, tomonaka yango wapi? Na esika moko te.

¹³⁶ Nakondima ete ba-Pantekotiste nde bazali bato ya pembeni na Yango mpenza koleka nyonso, mpo bazali awa na Éleko ya Lingomba ya Laodikia. Bazalaki na Solo, kasi baboyaki Yango. Bakómaki mwa móto ná Yango, mpe Nzambe asánzaki bango na monoko na Ye. Elóngobani mpenza na Makomi.

¹³⁷ Bokoki kosala te ete Makomi wana ébuka lokuta. Bomoni? Ekotikala ntango nyonso solo. Komeka te ko . . . Likambo bobele moko, komeka te kotia na molongo makanisi na yo na . . . to Makomi na makanisi na yo. Kasi nde . . . yo nde mitiá na molongo ná Makomi. Na ntango yango nde okómi kotambola elongo ná Nzambe. Ata osengeli kokata, to kobwaka biloko boni, mitiá na molongo ná Yango. Bomoni?

¹³⁸ Bótala ndenge Esalaki na mbala ya liboso oyo Ekitaki. Ee, soki Nzambe asalaki ndenge wana mbala ya liboso, Asengeli kosala ndenge wana mbala ya mibale. Asengeli kosala ndenge wana mbala nyonso, soki te, Asálaki libunga mbala ya liboso.

Bomoni, biso lokola bato, tokoki kosala mabunga. Nzambe akoki kosala te.

¹³⁹ Mokano ya liboso ya Nzambe ebongi be. Mpe lolenge oyo Aponá kosala makambo, nzela mosusu ekoki kozala te, ya malamu koleka. Akoki kobongisa yango koleka te, mpo ebongi be, mpo na kobanda. Soki ezali bongo te, na bongo, Azangi nsuka te. Kasi soki Azali na nsuka te, na bongo Ayebi-nyonso. Mpe soki Ayebi-nyonso, Azali na-nguya-nyonso. Amen! Asengeli kozala bongo, mpo na kozala Nzambe. Bomoni? Boye, o—okoki koloba te: “Abakisaki mayele.” Abakisaka mayele koleka te, Azali—Azali liziba mpenza ya bwanya nyonso. Bomoni?

¹⁴⁰ Bwanya na biso awa eutaka na Satana. Tosangolaki yango na Edene, epai tokabaki kondima mpo na kozua bwanya. Eva moto asalaki yango.

¹⁴¹ Sikawa, liboso babengaki ye motemeli-na-Klisto. Na etape ya mibale, abengamaki mosakoli ya lokuta, mpo molimo yango katikati na bato elátaki nzoto.

¹⁴² Bozali komikanisela, mobuti-mpunda ya mpembe azalaki na motolé te, ntango abandaki, kasi na nsima, ye . . . apesamelaki motolé. Mpo na nini? Azalaki molimo ya Banikolaiti, mpo na kobanda; na nsima alataki nzoto kati na moto; na bongo balatisaki ye motolé, azuaki ngwende mpe balatisaki ye motolé.

Na nsima, asalaki mosala yango, na ntango molai, ndenge tokomona yango wana tozali . . . Bilembo ebukani.

¹⁴³ Na nsima tomoni, nsima na ntango molai wana, Satana abwakisamaki uto na Likoló. Akitaki na nsé, kokokana na Makomi, mpe amifandisaki na ngwende. Bókaniisa naino, amifandisaki na ngwende, kati na moto yango, mpe akómaki nyama. Mpe azalaki na nguya, na nguya likoló na nyonso, lokola oyo azalaki kosala na yango bikamwa nyonso ná makambo nyonso, oyo—oyo, to koboma bato, bitumba ya nsomo ná makambo nyonso oyo—oyo Roma akokaki kosala. Malamu. Azalaki koboma na bitumbu ya nkanza ya Baroma. Mpenza, oh, tokokaki mpenza kokotisa biteni ya Makomi awa!

¹⁴⁴ Bómikanisela, Yesu Klisto akufaki na etumbu ya Roma, etumbu ya liwa.

¹⁴⁵ Nsango oyo nazali na yango na motema na ngai, mpo na koteya awa, na liyangani oyo ekoya, Mokolo ya mitano Mosanto, nsima ya nzanga, elobeli maloba misato to minei, bomoni. “Kuna, bango babakaki Ye na ekulusu.” “*Kuna*,” esika ya bulee koleka, ya basambeli koleka bisika nyonso na mokili, ezalaki Yelusaleme. “*Bango*,” bato (oyo basengelaki kozala) basantu koleka bato nyonso na mokili, Bayuda. “Kuna, bango *babaki*,” etumbu ya nkanza koleka, oyo Roma ekokaki kopesa. “Babaki Ye.” Nini? Moto monene, koleka bato nyonso oyo basílá kozala na bomoi. “Kuna, bango babákaki Ye na ekulusu.” Oh, la la!

¹⁴⁶ Nzambe ásungá ngai mpo nákotisa Yango na etonga ya bato ya mombongo wana, na lolenge ete bámona epai wapi batelemi. Malamu. Sikawa, ezali mpo na kozala ndenge mosusu te, ezali mpo na kozala mabe te; kasi mpo na koningisa Yango, kino bandeko yango bámona ete bato na bango ya lokumu ná basángó na bango ya bulee, ná makambo oyo bakomaka na zulunale oyo ya Bato na Mombongo, ezali na ntina te. Baklisto bazali na ntina moko te ya kobenga moto “Tata.” Bazongelaka kaka, namekaka kosunga bango na nyonso oyo nakoki kosala (Bomoni sikawa bipai bande oyo ekokende.), boye, nasilisi, na ntembe te, nakozala na likambo mosusu te ya kosala ná yango. Malamu. Liboso, bómikaniselaka Klisto.

¹⁴⁷ Liboso, lokola Banik- . . . Banikolaiti, mpe eleko ya Banikolaiti ezalaki koluka nini? Ezalaki koluka komikabola na bato oyo bagángaka mpe babétaka maboko, mpe emonanaka lokola koyokisa bato nsoni; ndenge basálaki na Pantekote, bakómaki lokola bato balángwe masanga, kotenga-tenga na nsé ya Molimo, mpe nyonso wana. Balingaki ata moko na likamabo wana te. Balobaki ete balángwaki masanga. Mpe ntango bato ya lokumu . . . Boyoka! Bózanga oyo te. Ekoki koyokana lokola boléma mpo na bino, kasi ezali Solo. Ntango bato ya—ya lokumu babandáki kokóta, bakokaki komikitisa na likambo wana te.

148 Eloko oyo esalaka ete Nzambe ázala monene, ezali mpo Ye azali monene oyo ekoki na lolenge ete akoki komikitisa. Yango nde esalaka ete Ázala monene. Eloko moko te ezali monene koleka. Mpe Amikitisaki na nse mingi koleka oyo moto akoki komikitisa, koleka oyo moto asilá komikitisa. Azalaki Mokonzi ya Likoló, mpe Akitaki na—na engumba ya nsé koleka, awa na mokili, Yeliko. Mpe Amikitisaki mingi na lolenge ete moto ya mokuse koleka na engumba asengelaki kokitisa miso likoló na Ye, mpo na komona Ye. Boye te? Zakai. Ya solo. Abéngamaki na nkombo ya mabe koleka nkombo nyonso oyo ekoki kopesama na moto, “ndoki, molimo mabe, Bezezebula.” Lolenge wana nde mokili ezalaki kokanisa mpo na Ye. Akufaki liwa ya nkanza koleka. Azalaki na esika ya kotia motó na Ye te. Bibongiseli nyonso ebenganaki Ye.

149 Kasi Nzambe atómbolaki Ye likoló mingi na lolenge ete Asengeli kokitisa miso mpo na komona Likoló. Bomoni ndenge Nzambe amikitisaka. Bomoni? Mpe Apesaki Ye Nkombo ya monene mingi na lolenge ete libota mobimba ya Likoló ebengami na Nkombo na Ye, ná libota mobimba ya—ya mokili. Libota mobimba na mokili, nkombo na yango “Yesu.” Mabota nyonso na Likoló, nkombo na yango “Yesu.” Mpe Nkombo ya monene na lolenge ete mabolongo nyonso ekogumbama, mpe minoko nyonso ekotatola, mpo na Ye, ete Azali Nkolo; ézala awa to na ewelo. Ewelo ekogúmbamela yango. Nyonso mosusu ekogúmbamela yango. Bomoni? Kasi liboso ezalaki komikitisa, na nsima ekomaki monene. Bomoni? Nzambe nde átombola. “Ye oyo akomikitisa, Nzambe akotombola ye.” Bomoni?

150 Sikawa, tomoni ete molimo oyo *nikao* ezalaki na mposa ya bwanya, kozala na mayele mingi. Esengelaki kobanza yango, ndenge esalemaki na Edene, kobanza mpo na kotelemela Liloba na Nzambe, na nzela na bwanya, mpe lingomba ekweyaki na motambu yango. Ezalaki nini?

151 Sikawa, tóloba, soki tozui losambo oyo, mpe tozui etonga ya bato lokola biso, soki botondisamaki mpenza na Molimo te. Mpe tózua, tóloba. . . Sikawa, nazali na eloko moko te ya kotelemela moyangeli ya engumba na biso. Nandimi te ete nayebi ye, M. Bottorff. Azali moyangeli kino lelo? M. . . Ngai. . . Bomoni? Ngai. . . M. Bottorff azali moninga malamumu mpo na ngai, bomoni. Kasi, tóloba, moyangeli ya engumba, ná mapinga ya police mobimba, ná—ná ba-commissaire nyonso, tóloba, bango—bango nyonso basámbelaka awa. Eloko ya liboso boyebi, soki bazui kaka mwa likanisi moko na motó na bango, mpe babandi koloba yango na likita mpe na bato ya awa, koloba: “Sikawa boyebi nini? Likambo oyo esengeli kozala bongo te.” Soki botondisami na Molimo te, mpe bozali na moto ya solosolo te na eteyelo, oyo atondisami na Molimo, eloko ya liboso boye, bokokóma kokokisa mposa na bango. Ntango mosusu ekeke oyo te; ntango mosusu ekeke oyo ekolanda.

152 Mpe wana nde lolenge yango ebandaki. Bomoni? Mpo na nini? Bazalaki koloba: “Bóyoka. Ezoyokana malamú.” Bino bolingaki koyoka.

153 Tóloba, moto moko akoti awa, oyo akoki koloba: “Losambo oyo ezali moke mingi. Tótonga losambo ya monene. Nakotongela bino losambo moko awa, ezali . . . ekozala na motuya ya mbongo mingi, ya dollar nkóto nkama mitano. Yango nde ekotiama kuna. Ngai moko nde nakotala likambo ya kopanza nsango yango.” Ntango basali bongo, elingi koloba, bazali na ntina oyo balandaka; mbala libwa likoló na zomi, boyebi, bato ya ndenge wana. Eloko ya liboso boyebi, bongo soki asali yango, akotambwisa makambo na ndenge na ye moko. “Bokoki koloba eloko moko te, mpo Ndeko John Doe oyo azali kuna, ye nde moto apesaka mbongo na losambo oyo.” Bomoni? Na bongo bokozua elenge Ricky moko, oyo auti na likindo moko boye, oyo ayebi na ye makambo ya Nzambe kaka bongo bongo, lokola Hottentot moko na oyo etali butu ya Ezipito, akoya wana mpe akotosa nyonso oyo moto yango akoloba, mpo asombelaka ye motuka ya sika ntango nyonso, mpo atikaka ye akende nzinganzinga, mpe asombelaka ye eloko *oyo*, oyo *wana*, ná oyo *mosusu*.

154 Sikawa, ebandaki mpenza ndenge wana. Ya solo. Bótala, bwanya ná mayele! Bazalaki koloba: “Sikawa bóyoka naino, eyokani mpenza malamú, boye te? Sikawa, mo . . . ba—basi na biso, bokeseni nini esalaka, ndenge babongisaka suki na bango?” Kasi Biblia elobi ete esalaka mpenza bokeseni. Bózua kaka likambo moko wana, kati na makambo nkama na nkama mosusu. Bomoni? Esalaka mpenza bokeseni. Nzambe alobaki ete esalaki bokeseni, boye, ezali bokeseni.

155 Kasi, bomoni, soki babandi kosala bongo, likita ya bayangeli misolo, basungi ná nyonso wana, mbala moko bokomona, to mokengeli akokota, to akobima. Esili. Bomoni, bato nde bavotáki yango. Malamú.

156 Sikawa bótala, molimo yango ebandaki kosala, mpe losambo oyo ezali bongo, oyo ezalaka na bato mingi ya lokumu, ebandaki ná biloko mingi ya minene, ná mbongo mingi mpenza, kino nsima na mwa ntango, bayokaki yango mpe bakweyaki na likambo yango, na motema mabe ya zabolo.

157 Mpe yango nde likambo mpenza oyo Eva asalaki na elanga na Edene. Sikawa, bóyoka yango. Ezali ya solo. Bótala, mwasi ya nzoto, mwasi ya Adama, liboso ázua ye lokola mwasi, akweyaki na motambu ya mayele mabe ya Satana, ya kotelemela Liloba na Nzambe, na kobanzábanzáká Yango. Liboso Adama ábika ná Eva lokola mwasi, Satana asilaki koleka liboso. Ezali ya solo. Boyokaki *Nzete ya Mwasi na libala*, oyo nateyaki. Yango nde elobelaka yango, bomoni. Malamú. Sikawa bótala, kuna, Eva akweyaki mpo na kobanzabanza. Sikawa ye Satana nde amekaki kobánzabanza Yango.

Mwasi alobaki: “Kasi Nkolo alobaki . . .”

158 Ye alobaki: “Oh, oyebi, kasi, na ntembe te, Nkolo akosala yango te. Omoni? Yo, yo ozali na mposa kozala na bwanya. Ozali na mposa ya koyeba likambo. Ee, ozali mpenza mwana moko oyo ayebi eloko moko te. Omoni? Osengelaki koyeba makambo.” Oyo wana ezali mpenza Satana! Oh, la la!

159 Oyo wana ezali mpenza baike na bato, ya makambo ya mikolo oyo, bomoni: “Oh, bango bazali bobele batúntuki moko boye. Bókipaka bango te, bomoni. Bólandaka te . . . Omoni?”

160 Sikawa, mwasi ya liboso, na nzoto, ya libota na boto, liboso mobali na ye áya epai na ye, mwasi yango asilaki kokweya longwa na ngolu, na koyókáká lokuta ya Satana, nsima na Nzambe kobómba ye nsima na Liloba na Ye. Soki átikalaka nsima na Liloba, alingaki kokweya ata moke te. Sikawa oyo wana ezali na nzoto oyo, bótala, mwasi na nzoto oyo.

161 Mpe elakeli mabe yango ezalaki nini, elakeli mabe mpenza, ya kobimáká libanda na Liloba na Nzambe?

162 Sikawa bómikanisela, andimaki Yango pene na ntuku libwa na mwambe likoló na mokama. Esengaka kaka ete ótika bobele Eloko moko. Bomoni? Mwasi andimaki eteni na Yango ya monene. Oh, na ntembe te. Alobaki likambo Oyo, mpe Satana andimaki ete Yango ezalaki ya solo. Soki akoki bobele komema yo na coin moko, yango nde nyonso oyo alukaka. Bomoni? Nyonso oyo osengeli kosala ezali ete ótengamisa lisasi mwa moke *boye*, mpe ekozanga kobeta esika okani. Bomoni? Esili. Sikawa, andimaki eteni na Yango ya monene mpenza, ata bongo, azangaki kobeta yango.

163 Sikawa, mpe—mpe mbano, mpo atikaki Liloba mpo na kozua mwa eteni moko mpamba ya mabánzo.

164 Ee, ndakisa: “Bongo likambo ya basi?” To: “Mpo na nini olingaka kolobela likambo ya ndenge wana?” Kasi mwa makambo nyonso wana. “Wapi bokeseni, soki ezali ndanga ya liboso?” Ezali na ntina! Bosengeli . . .

165 Esengeli kosembolama. Tozalaki kaka komekameka na ntina na Yango, na kati ya bileko nsambo ya lingomba, tóloba. Kasi ngonga ekoki, ntango Nzambe alobi Yango. Mpe Alobi Yango kaka te, kasi Atalisi Yango, atatoli Yango, mpe andimisi Yango. Ya solo. Soki Asali yango te, na bongo ezali Nzambe te, esili. Nzambe azalaka nsima ya Liloba na Ye.

166 Bótala sikawa. Sikawa, mwasi, na nzoto oyo, asalaki ete liwa ébeta nzoto oyo, mpo ayokaki mabánzo, mpo na kokóma na bwanya, kokóma na bwanya na esika ya kotikala nsima na Liloba mpe kosala eloko oyo Nzambe ayebisáká ye. Azalaki na mposa ya bwanya, ya kokóma na bwanya. Mpe ayokaki mabánzo, mpe—mpe asalaki ete bato nyonso bábunga. Bomoni?

¹⁶⁷ Sikawa, na mbala oyo, mwasi ya molimo, Mwasi na libala ya Klisto, oyo abandaki na Mokolo ya Pantekote, na Lingomba ya bantóma na ebandeli, abungisaki likambo yango moko na Likita ya Nicée. Lee, oyebi ete ezali ya solo. Mpe na—na Likita ya Nicée, ntango akabaki makoki na ye ya bokulutu na molimo, mpo na kozua bandakonzambe minene ya Constantin ná biloko oyo akabelaki bango kuna, mpe atekaki makoki na ye ya bokulutu na Makomi mpo na kozua eboke ya biyambweli ya Baroma. Sikawa, ezali eloko moko makasi mpo na Bakatoliko. Kasi ba-Protasant basali kaka ndenge moko, mpe batalisami awa na Biblia lokola mwana mwasi “ya mwasi ya ndumba, ya mwasi ya pité.” Ezali mpenza bongo, bango nyonso! Komilongisa ezali te.

¹⁶⁸ Kasi uta na oyo wana, litiká moko moke ezangaka te ntango nyonso, elongo, yango nde esalaka Mwasi na libala.

¹⁶⁹ Bótala, abungisaki makoki na ye ya bokulutu, bomoni, liboso mobali na ye ákutana ná ye. Bomoni? Liboso na libala, abungisaki nguya na ye.

¹⁷⁰ Sikawa, bómikanisela ete kuna, alobaki: “Nafandi lokola mwasi-mokonzi. Nazali na bosenga ya eloko moko te,” na Eleko ya Laodikia wana. “Nazali mozui mpe nakómi na biloko mingi, mpe bongo na bongo. Mpe, oh, mokili mobimba ezali kotalela ngai. Ngai nde lingomba monene mpe mosanto, mpe bongo na bongo. Tozali *oyo* boye,” eleko mobimba.

¹⁷¹ Kasi Ye alobaki: “Oyebi te ete ozali bolumbu, mokufi miso, moto na mawa, na bolozu, mobola, kasi oyebi yango te.” Nde lolenge yango. Sikawa, soki Molimo Mosanto alobaki ete ekozala lolenge wana na mikolo ya nsuka, ezali ndenge wana! Nzela ya kozunguluka yango ezali te. Nde ndenge wana yango ezali.

¹⁷² Sikawa bótala malamau. Sikawa, ntango atekaki makoki na ye ya bokulutu kuna, makoki na ye ya nguya, ya Liloba, asalaki nini? Ntango Eva asalaki bongo, asalaki ete bozalisami ébunga; bozalisami mobimba ekweyaki na nsé na ye.

¹⁷³ Sikawa bótala, ntango lingomba esalaki bongo, ntango eyambaki biyambweli na esika ya Molimo ná Liloba, élakelaki mabe système yango mobimba. Système ya dénominasion moko na moko oyo etikálá kozala, to ekozaláká, elakamaki mabe ná yango, mpe ekweyaki, mpamba te nzela mosusu ezali te.

¹⁷⁴ Soki bosangisi etonga ya bato elongo, mpo na koluka eyano na likambo moko, moko azui likanisi *oyo* boye, mosusu azui likanisi *wana* boye, mpe mosusu azui likanisi *oyo* boye. Mpe basangisi makambo yango mpe baningisi yango makasi, mpe, na ntango ebimi, wana nde eloko bokokomisa ye.

¹⁷⁵ Yango mpenza nde oyo basalaki na Likita ya Nicée. Yango mpenza nde oyo basalaka epai ya ba-Methodiste, ba-Presbytérien, Eglise de Christ, ná bamosusu. Mpe moto moko te, ata Nzambe amonisi ye eloko moko, bosengeli kolakisa yango ndenge mikanda na bango, bindimeli—bindimeli na bango elobi, soki

te, bakobengana yo. Sikawa, bóyebisa ngai yango te. Nazalaki kuna, bomoni, mpe nayebi yango.

¹⁷⁶ Mpe yango mpenza nde oyo esalemaki, na bongo, mobimba na yango elakelami mabe. Kokamwa te ete mwanje alobaki: “Bóbima kati na ye, libota na Ngai, mpo bósangana na malozi na ye te.” Mpamba te, ako. . . Alakelami mabe, mpe asengeli konyokwama na elakeli mabe ya nkanda ya Nzambe likoló na ye, mpo atekaki nguya ná makoki na ye. Bomoni? Kasi. . . Oh, la la!

¹⁷⁷ Kasi, bómikanisela. Lokola ekómi ndenge wana, kasi ata bongo, Nzambe alakaki, na Yowele 2:25, soki bolingi kokoma yango: “Na mikolo ya nsuka. . .”

¹⁷⁸ Ntango Alobaki: “Oyo likelele oyo ekataka etikaki, likelelele oyo ebebisaka eliaki yango; oyo likelelele oyo ebebisaka etikaki, ma—makélelele oyo efúlukaka elei yango; oyo likelelele oyo efulukaka eliaki. . .” Mpe bongo na bongo, likelelele moko nsima na mosusu, ezalaki koya kolia Lingomba yango kino sukasuka, Etikalaki kaka ekúmu ya mpamba. Bótala malamú! Oyo Baroma batikaki, ba-Luthérien baliaki yango; oyo ba-Luthérien batikaki, ba-Methodiste baliaki yango; mpe oyo ba-Methodiste batikaki, ba-Pantekotiste balei yango; bomoni, kino etikali kaka ekúmu.

¹⁷⁹ Mpe boyebi nini? Soki bozui makélelele yango, likelelele oyo efúlukaka ná likelelele oyo ebebisaka, mpe bongo na bongo, mpe bolandeli yango na—na buku mobimba, bokomona yango. Ezali kaka likelelele yango moko, na bitápe ndenge na ndenge.

¹⁸⁰ Bósimba likambo yango malamú. Ezali mpe bongo na Bilembo! Ezali makélelele yango moko. Bokomona yango ntango tokotalisa yango, yango wana nakoyebisa bino yango sikawa. Ezali likelelele yango moko, ntango nyonso. Makélelele yango minei; minei awa. Mpe ezali wana, bazali kaka eloko yango moko. Ezali molimo yango moko. Oyo moko etikaki, mosusu eliaki yango; mpe oyo *oyo* moko etikaki, mosusu eliaki yango; ndenge wana, kino bakitisaki yango téé na ekúmu.

¹⁸¹ Kasi Yowele alobaki: “Nakozongisa, elobaki Nkolo, mibu nyonso oyo likelelele yango eliaki.”

¹⁸² Ezali nini? Akosala yango ndenge nini; soki ebandaki, motemeli-na-Klisto, na telemeláká malakisi ya Klisto, nde eyambaki biyambweli na esika ya Liloba? Mpe kati na mibu ebele, ba-reformateur bazalaki koluka koyeba yango, ndenge Biblia elobi.

¹⁸³ “Kasi na mokolo na nsuka, na koyula. . .” Emoniseli 10:1-7, Alobaki: “Mabombami ya Nzambe ekokokisama na mikolo ya nsuka, ntango mwanje ya nsambo akoyula kelelo.” Malaki 4, elobaki ete Ye “akotinda Eliya, liboso mokolo ya nsómo éya na mokili, ntango Akozikisa yango lokola litúmbu ya móto. Mpe akobongisa, mpe akozongisa ba—bana na Kondima ya batata,” Kondima ya Pantekote, ya bantoma, ya ebandeli, elakamaki ete

ekozongisama. Sikawa, ezali mpenza polele, ndenge Makomi ekoki koloba yango. Sikawa elakamaki. Mpe soki tozali na mikolo ya nsuka, likambo moko esengeli kosalema. Bomoni? Mpe ezali kosalema, mpe tozali komona yango.

¹⁸⁴ Bótala bosato ya Satana. Moto yango moko azali koya; alati nzoto, longwa na moko kino na mosusu. Lolenge wana nde mwa banyama yango esalaki, makélele yango, moko nsima na mosusu, ya solo mpenza. Banikolaiti, “motemeli-na-Klisto na molimo.” Pápa, “mosakoli ya lokuta.” “Nyama,” zabolo ye moko, alati nzoto. Akoki kosala yango te. . .

¹⁸⁵ Sikawa, bóbosana yango te, wana bozali kolanda likambo oyo. Bokomona ete yango nde babuti-mpunda yango bazali kosala. Bomoni, nazali kotalisa bino elili awa. Soki náyemaka yango na etánda, bokokaki kosósola yango malamú koleka. Bomoni, nazali kolandela.

¹⁸⁶ Liboso, sikawa. Bómikanisela likambo oyo. Eloko ya liboso oyo ye azali, azali “molimo ya motemeli-na-Klisto.” Yoane moto alobaki bongo. “Bana mike, molimo ya motemeli-na-Klisto esili kobanda kosala kati na bana ya botomboki.” Bomoni, likambo yango esilaki kobanda kosala. Na nsima ekómaki lokola “elobeli,” na eleko ya lingomba oyo elandaki. Mpe na eleko ya lingomba oyo elandaki, ekómaki “mateyo.” Mpe na eleko ya lingomba oyo elandaki, elatisamaki “motolé.” Sikawa, ezali polele lokola mai ya komela na esika nyonso okotanga, boye te? Bomoni? Bomoni, ye wana ayei.

¹⁸⁷ Sikawa, liboso, abéngamaki (nini?) “molimo ya motemeli-na-Klisto,” mpo azalaki kotelemela Liloba. Yango nde ebandisaki yango. Yango mpenza nde esalaki likambo na mobimba, kopesa mokongo na Liloba na Nzambe. Ezali te mpo Eva ntango mosusu abétaki Kaina mbata mokolo moko. Bomoni? Wana te nde eloko esalaki yango. Eloko ya liboso, oyo ebotoke likambo yango nyonso, ezali ete apesaki mokongo na Liloba. Apesaki mokongo na Liloba. Mpe eloko ya liboso oyo ebandisaki kindumba kati na lingomba ya Nzambe na bomoi, Mwasi na libala ya Klisto, ezali ete apesaki mokongo na Liloba mpe andimaki biyambweli ya Roma na esika ya Liloba na Nzambe. Likambo nini ekómelaki ebongiseli moko na moko? Esalaki likambo yango moko mpenza.

¹⁸⁸ Sikawa, kasi elakamaki ete, na mikolo ya nsuka, Akofungola nzela mpo na kozongisa lisusu. Liloba ya Nkolo ekoya na mokili, ndenge Asalaki yango na ebandeli, mpe, oh, mpe Akozongisa (nini?) oyo ebandisaki yango. “Kotelemela Liloba.” Mpe moto yango, oyo akopakolama na Molimo ya Nzambe, asengeli kosala nini ntango akoya? Ye “akozongisa Kondima ya bana epai ya batata.” Lolenge wana nde Akozongisa yango. Mpe soki ozui Liloba moko oyo, na esika moko oyo Yango ezali *Awa*, Ekosala likambo yango moko.

189 Yesu alobaki: “Soki moto moko azali ya Ngai! Mpe ye oyo akondimela Ngai, misala oyo Nazali kosala, ye mpe akosala yango.” Mpe ntango baséngaki na Ye ete ásala makambo moko boye, Alobaki: “Nasálaka bobele oyo Tata alakisaka Ngai. Nasálaka eloko moko te, kino Nakomona yango liboso. Oyo Namonaka Tata kosala, yango nde Ngai mpe Nasalaka. Tata asalaka, na bongo Ngai mpe nasalaka.” Bomoni? Bomoni yango te? Ee, ezali kaka lokola kotánga zulunále. Bomoni?

Sikawa, sikawa, liboso, na boye akómaki “motemeli-na-Klisto.”

190 Sikawa, akokaki te kozala motemeli-na-Klisto bobele na molimo. Na nsima, akómaki motemeli-na-Klisto, mpe molimo yango ezuaki moto moko oyo azalaki koteya makambo yango moko oyo motemeli-na-Klisto yango azalaki kosala, bongo na nsima akómaki “mosakoli ya lokuta,” epai ya molimo ya motemeli-na-Klisto. Sikawa, ndenge nini mpo na moto oyo azali kati na ebongiseli? Bósala ndenge bolingi. Nayebi te eloko nini bokanisaka na ntina na yango. Malamu.

191 Sikawa, sukasuka, akómi “nyama.” Sikawa bozela, mpe tokokóma wana nsima na mwa ntango, bomoni. Malamu.

192 Sikawa, lokola bosato ya Satana ezalaka ndenge wana; ezali ntango nyonso Satana. Satana, “molimo ya motemeli-na-Klisto.” Molimo ya motemeli-na-Klisto, elati nzoto, ekómi “mosakoli ya lokuta.” Na nsima, ekómi “nyama.” Bomoni? Ntango. . . Ezali te molimo mabe, oyo ezalaki kati na motemeli-na-Klisto; kasi Satana ye moko, ntango babangani ye, akiti mpe azui esika oyo molimo mabe ezalaki. Zabolo, na ntango yango, na ntango yango zabolo alati nzoto kati na moto. Ezali se komizongela yango moko.

193 Yango nde oyo Yudasi Mokeliota azalaki. Mpe asalaki nini? Azalaki nde moko na bato oyo bazalaki kotelemela Klisto? Ee, azalaki mobombi misolo, atambolaki elongo ná Ye. Ya solo mpenza. Atambolaki mpenza elongo ná bango. Akendeki kuna mpe abenganaki milimo mabe, mpe asalaki mpenza makambo oyo bango basalaki.

194 Mpe Klisto azalaki Nzambe oyo alati nzoto; Nzambe, oyo alati nzoto ya mosuni, Emanuele. Mpe Yudasi azalaki mwana na libebi. Mpe Yesu azalaki Mwana na Nzambe. Nzambe Alati nzoto; molimo mabe elati nzoto.

195 Bato mosusu bamonaka bobele bikulúsu misato na ntango wana. Ezalaki nde minei. Misato ezalaki na Gologota, oyo biso tomonaka. Wana ezalaki Yesu na katikati, moyibi moko na loboko na Ye ya mwasi mpe moyibi moko na loboko na Ye ya mobali.

196 Mpe bótala malamau. Moyibi moko alobaki na oyo mosusu, to alobaki na Yesu: “Soki. . .” Sikawa, boyebi ete Azali Liloba.

Kasi: “Soki ozali Liloba, okomibikisa te? Okosala eloko moko te na ntina na yango?”

¹⁹⁷ Ezali ndenge moko lelo. Bosilá naino te koyóká milimo mabe ya kala oyo koya, koloba: “Soki ondimaka lobiko na nzoto uta na Nzambe, miso ya moto moko yango *oyo*, okofungola miso na bango te?” “Bomá ngai miso! Bomá ngai miso!” Molimo mabe moko wana ya kala. Bomoni? “Kita na ekulusu, bongo tokondima yo.” “Soki ozali Mwana na Nzambe, bóngola mabanga oyo na mapa.” Molimo yango moko.

¹⁹⁸ Longwa na yo wana, omoni. Te. Lolenge wana nde Yesu asalaki. Atikálá kosala eloko te mpo na kosepelisa moko na bango.

¹⁹⁹ Bakangaki Ye elamba na loboko . . . na miso na Ye ya motuya, ndenge *wana*. Mpe bazuaki fimbo, mpe babetaki Ye na motó. Balobaki: “Yebisa biso! Soki ozali mosakoli, sikawa yebisa biso nani abeti yo.” Bazalaki kopésana fimbo, moko na mosusu. “Sikawa yebisa biso nani abeti yo, bongo tokondima ete ozali mosakoli.” Afungolaki monoko na Ye ata moke te. Afandaki kaka wana. Bomoni? Asalaka makambo te mpo na kosepelisa bato. Asalaka bobele ndenge Tata alobi, bomoni. Bomoni? Tótika bango bákende liboso. Ntango na bango ekoya. Bómitungisa te. Iyo, misie. Sikawa, basimbaki elamba na Ye, bayokaki nguya moko te.

²⁰⁰ Kasi mwa mama moko ya moke azalaki na bosenga, asimbaki bobele elamba na Ye. Abalukaki mpe Alobaki: “Nani asimbi Ngai?” Ah-ha. Ezali nini? Kosimba ya ndenge mosusu. Etalelaka lolenge oyo osimbi Ye, bomoni, bomoni, oyo yo ondimi. Sikawa, bomoni?

²⁰¹ Sikawa, lokola Satana ako . . . asili komilatisa nzoto, longwa na motemeli-na-Klisto kino na mosakoli ya lokuta sikawa. Mpe na mikolo ya Bayuda, ezalaki “motemeli-na-Klisto,” katikati na lingomba ya ebandeli. Na bileko ya molili, akómaki “mosakoli ya lokuta,” mpo na mokili. Bozali komona ye kuna, ná “kopo na ye ya masumu na nko”? Sikawa, oyo wana ezali mpo na eleko ya lingomba sikawa.

²⁰² Kasi na eleko oyo ekoya nsima na Lingomba kozonga na Ndako, akomi nyama, akomi zabolo oyo alati nzoto, dalagona motane ye moko. Oh, la la! Bokoki kosósola oyo nalingi koloba te? Alati nzoto kati na bato na ye, na ntango wana. Asili kokanga bato na ye na nguya na ye. Mosakoli ya lokuta yango nde asili kokótisa bango na likambo yango, na masakoli na ye. “Apesi bango nguya ya kopengwisa mpo bándima lokuta mpe bákweisama na nzela na yango.” “Bazali koboya Liloba; ná lolenge ya kosambela.”

²⁰³ Nzambe asalaka, esika na Ye, na bosato. Kolóngisama; kobúlisama; mpe koláta nzoto Ye moko na kati ya bato na Ye, na nzela ya libatizi ya Molimo Mosanto.

204 Ndenge moko, zabolo alandaka kaka elilingi, na ndakisa ya Klisto. Oh, Satana alati nzoto ye moko kati na . . . Sikawa bótala malamumu. Satana . . .

205 Ntango Yesu Ye moko alati nzoto kati na bato na Ye, Bomoi mpenza oyo ezalaki kati na Klisto ekómi kati na moto.

206 Ekosala eloko nini soki ozui bomoi ya nzete ya raisin mpe okotisi yango na nzete ya citrouille? Ekobota lisusu ba-citrouille te; ekobota ba-raisin. Bongo soki ozui bomoi ya nzete ya pêche mpe okotisi yango na nzete ya poire? Ekobota ba-poire? Te. Ekobota ba-pêche. Bomoi etalisaka oyo yango ezali. Bomoni?

207 Ntango olobi, soki oyoki bato koloba ete bazali na Molimo Mosanto, mpe baboyi Liloba oyo, eloko moko ezali kotambola malamumu te. Molimo Mosanto nde akomaki Liloba yango.

208 Mpe Yesu alobaki boye: “Soki moto azali na Molimo na Ngai kati na ye, akosala misala na Ngai.” Bolingi kotanga yango? Bolingi kokoma yango? Ezali Santu Yoane 14:12. Iyo. Malamumu. “Ye oyo akondimela Ngai, misala oyo Nazali kosala, ye mpe akosala yango. Akosala ata mingi koleka oyo, mpamba te Nakei epai na Tata.” Bomoni? Na nsima, Akobulisa mpe Akopetola ye, mpo ákoka kotelema liboso na Nzambe. Litanga ya mai ya bíki wana ekwei kuna, mpe ememi ye na ngámbo mosusu ya libulu monene. Bomoni?

209 Sikawa bótala malamumu. Satana, ntango aláti nzoto ya bato na ye, basalaka misala oyo ye azalaki kosala. Bomonaka yango, boye te? Asalaki nini? Ayaki mbala moko epai ya mwasi oyo ayebaki mabe te, mpo na kopengwisa ye. Mpe ezali yango mpenza nde milimo mabe mosusu oyo esalaka, ekendeke esika moko mpe elobaka . . . Elenge mokengeli moko abandi mosala esika moko boye; bakoya wana mpe bakoloba: “Oh, soki kaka oyei kosangana ná biso!” Ha! Ha! Mosala ya zabolo moko wana. Sikawa, ezali Solo! Mpe ntango Satana alati nzoto na kati ya lingomba na ye, mpo na kokóma molimo mabe, na ntango wana, bango nde bakómaka koboma, koboma bato, ná nyonso wana. Mpamba te, Satana azali mobomi, mpo na kobanda; azali moto ya lokuta mpe . . . Bomoni? Malamumu.

210 Eloko nini Satana asalaka ntango asalaka, ntango alataka nzoto katikati na bato? Atindami kozala na mayele mabe. Azalaka na mayele mabe. Bóluka na Biblia, mpe bólakisa ngai epai Nzambe asílá kosala ná bato ya mayele mingi. Bóluka yango, mpe bótala soki, ntango nyonso, ezalaka te ete bato ya mayele mingi nde bakonzamaka na zabolo. Ezali maloba ya makasi, kasi ezali solo. Nabeti na bino mondengé ya kokokanisa bakitani ya—ya Abele ná ya Kaina; mpe, bózonga nsima na bikeke zomi na minei wana, mpe bokomona banani bazalaki na ngámbo ya bato na mayele mingi, mpe banani bazalaki bato na komikitisa. Ah-ha.

211 Mpo na nini Yesu aponaki te bato ya ndenge wana? Ye azuaki balóbi mbisi ná bato oyo bayebaki ata kokoma nkombo na bango moko te, mpo na kotia bango bakambi ya Lingomba na Ye. Ezali solo. Bwanya ezali—ezali eloko mpamba; e—etelemelaka Klisto. Bwanya ya mokili etelemelaka Klisto, ntango nyonso. Yesu ayebisaki biso ata moke te ete tókende kotonga makindó; Ayebisaki yango ata moke te; kosala biteyelo ya Biblia. Alobaki: “Bóteya Liloba! Bóteya Nsango-malamu!” Na bongo soki Alobaki: “Bilembo oyo ekolanda baoyo bakondima,” bomoni, bosengeli kozala na . . . Na elobeli mosusu, Alobaki: “Bókende kotalisa Nguya ya Nzambe, na bikólo nyonso.”

212 Sikawa bótala malamumu. Mosala ya Satana ezali ya kobebisa Liloba na Nzambe, na mabanzo ya bwanya. Oh, la la! Oh! Na nsima, atiaka bato na ye elembo, na koboyáká Liloba ya ebandeli. Sikawa bótika ete . . .

213 Boko—boko—bokolinga koyikela ngai mpiko mwa moke lisusu, mpo bósosola likambo oyo? Oyo, nalingi te bózanga likambo oyo. Bótika ete nátalisa bino elilingi na yango, mpo bókoka kosósola yango na elilingi mpe na Liloba, ná nyonso wana. Bo—bokoki te . . . Bosengeli te kozonga ná mobúlungano.

214 Na Kondimana na Kala, ntango moto azalaki kotékama na boómbo. Mobu moko ya yubile ezalaki koya, nsima na mibu ntuku mitano nyonso. Mobu ya ntuku minei na libwa, na nsima nde ezalaki mobu ya yubile. Mpe soki moómbo ayoki yango, mpe alingaki kozua bonsomi, eloko moko te—eloko moko te ekokaki kopekisa ye ákende na bonsomi. Akoki kobwaka kóngo na ye na nsé, mpe koloba “bótikala malamumu,” mpe kozonga epai na bango. Kelelo eyúlaki. Ya solo.

215 Kasi soki aboyi na ye kokende, mpe aseveli na nkolo-moombo na ye, na ntango wana, bakomema ye na kati ya—ya—ya tempelo, mpe bakozua tonga . . . Boyebi oyo tonga ezali. Mpe bakotobola ye litoi, mpe bakotia lidusú na litoi na ye. Mpe ezali elembo, ete akoki kozonga ata moke te. Ezali bongo? Asengeli kosalela nkolo yango mpo na libela. Ata mbala boni bayubile mosusu ekoyula, nyonso oyo ekosalema. Asili mpenza koteka ma—makoki na ye ya bokulutu, ya kozua bonsomi.

216 Mpe ntango moto aboyi Solo ya Nsango-malamumu, Satana atiaka ye elembo (esika nini?) na litoi. Abomaka ye matoi mpo ákoka lisusu koyoka Solo te, mpe esili mpo na ye. Akokangama na etonga oyo azali na yango, soki alingi na ye te koyoka Solo. Te.

217 “Bokoyeba Solo, mpe Solo ekopesa bino bonsomi.” Bomoni, Solo epesaka bonsomi.

218 Nzambe atiaka elembo baoyo ya Ye ntango bayáka. Nzambe atiaka elembo baoyo ya Ye na kokokisáká Liloba oyo Alakaki na nzela na bango. Ezali mpenza bongo, Santu Yoane 14:12.

Mpe eloko mosusu, oyo bokoki kokoma, ezali Malako 16. Yesu alobaki: “Bilembo oyo ekolanda baoyo bakondima.”

219 Sikawa tózua yango naino, mwa moke. Azalaki nde kosala maseki? [Losambo balobi: “Te.”—Mok.] Alingaki nde kolobela kaka...Alingaki nde kolobela bantoma, ndenge bamosusu bayebisaka biso? [“Te.”]

220 Bótala malamumu. Bótánga mobóko na yango. “Bókende na . . .” Wapi? [Losambo balobi: “Na mokili mobimba.”—Mok.] “Na mokili mobimba.” “Bótéya . . .Nsango-malamumu oyo na . . .” Nini? [“Bikelamo nyonso.”] “Bikelamo nyonso.” Ekei ata naino te ndambo na misato ya nzela na yango. “Bilembo oyo ekolanda, na mokili mobimba, na bikelamo nyonso, na bisika nyonso oyo Nsango-malamumu oyo ekoteyama. Bilembo oyo ekolanda baoyo bakondima,” kaka na mwa etonga moke te.

221 Lokola mobali moko mokolo moko azalaki koyebisa ngai: “Nzambe apesaki makabo ya kobikisa babeli bobele na bantoma zomi na mibale. Mpe . . .” Oh! Bandeko mingi bafándaki wana, ntango atelemaki mpo na koloba yango, bomoni. Alembaki mpenza, nsima na mwa miníti.

222 Boye sikawa bótala: “Na mokili mobimba, na bikelamo nyonso, bilembo oyo ekolanda.”

223 Bózua elembo ya kozanga kondima ya Satana te. Sikawa, akotia yo yango na mpokwa oyo, soki akoki kosala yango. Akotindika yo kino na etutu, mpe okobima awa mpo na koloba: “Nayebi na ngai te na ntina na oyo wana.”

224 Zóngá na ndako mpe yékola Yango, nsima na yango zalá sembo mpe bóndela. Mpamba te, nyonso elongobani mpenza koleka—koleka na Makomi, na ngonga oyo mpenza, na ngonga ya bulee oyo kati na ntango. Na mibu ebele, etalisami polele, mpo tokóma awa mpenza. Mpe oyo nde ngonga yango. Oyo nde ntango yango.

225 Sikawa kotika te ete átuba yo yango na litoi, elembo na ye ya kozanga kondima. Bomoni? Mpamba te, azalaki mozangi kondima, mpo na kobanda. Atiaki Yango ntembe. Malamumu. Oh, kotika ata te . . .Kotika te ete ásalela Makomi, na bwanya na ye, mpe—mpe ábongola Yango mpe ábebisa Yango ná bwanya na ye moko, na nguya ya mabanzo. Zalá kaka na komikitisa, mpe lobá: “Nzambe alobaki bongo, esili nye.” Sikawa, oh, tó . . .

226 Ntango elingi kobanda koleka, na bongo, malamumu ete tókata awa mpe—mpe tóbanda.

227 Sikawa tókende na Elembo ya Mibale. Ntango Mwana-mpate oyo abomamaki, oyo asekwaki afungolaki yango, Ezàlina-bomoi ya mibale, oyo azalaki lokola mwana-ngombe, alobaki: “Yaka kotala oyo libombami ya Elembo yango ezali.” Bomoni? Sikawa tokozua yango. Bóbosana te, Mwana-mpate

nde asengeli kofungola Elembo moko na moko. Mpe Ezàli-na-bomoi ya mibale. . .

228 Soki botalaki malamú, ezali kolandana na oyo toyekolaki, ná bileko nsambo ya lingomba, ndenge moko. Ya mibale. . . Ya liboso ezalaki nkosi; oyo elandi ezalaki—ezalaki. . . ezalaki lokola mwana-ngombe, to ngombe mobali, to eloko moko, bomoni.

229 Mpe Ezàli-na-bomoi oyo alobaki: “Yaka kotala,” sikawa, ntango Mwana-mpate afungolaki Elembo. Na bongo, akendeki kotala. Mpe ntango apusanaki, likambo nini esalemaki? Tótala likambo oyo amonaki sikawa. “Yaka, komona.” Libombami moko ezali awa, ekangami na elembo moko, ezali wana, ekokisi mibu pene na nkóto mibale sikawa. Tótala oyo yango ezali.

230 Sikawa tomoni awa ete amonaki (nini?) mpunda moko ya motane ebimaki. Sikawa, na lisosoli na ngai, na lisosoli na ngai, mopanga monene oyo asimlaki na loboko na ye. . . Sikawa tozali na makambo pene na misato ya kotala sikawa, na miníti zomi na mitano to ntuku mibale oyo ekolanda. Tótanga naino mpo tómona ndenge Alobi awa. “Mpe ebimaki. . .” Molongo ya 4.

. . . *mpunda mosusu motane ebimaki* (oyo ya liboso ezali mpembe): *nguya epesami na mofandi likoló na yango ete alongola kimia na mokili, . . . ete bato bábomana: mpe mopanga monene epesamaki epai na ye.*

231 Sikawa, bilembetele ezali awa, mpe tolingi kotalela yango na bokebi mpenza. Kasi, na lisosoli na ngai, na boyebi na ngai nyonso, bomoni, Yesu alobaki liboso likambo yango moko na Matai 24. Bomoni? Alobaki: “Bokoyoka nsango ya bitumba ná makeléle ya bitumba, kaka bitumba ná makeléle ya bitumba, mpe bitumba. Mpe, kasi,” Alobaki, “makambo nyonso wana esalemi naino te. Bomoni, ntango ekoki naino te.” Bomoni, batunaki Yesu mituna misato. Bomoni? Mpe Ayanolaki bango, na mituna misato yango.

232 Na esika wana nde bandeko na biso mingi bazuaki mobulu, komekáká kotia. . . Bandeko ta ba-Adventiste, na ntina na, mokolo ya nsambo mpe nyonso wana, kuna. . . “Mawa na mwasi oyo akozala na zemi mpe oyo akomelisa mwana mabéle, bikuke ekokangama mokolo ya sabata,” ná makambo ya ndenge wana. Oh, la la! Etali kutu motuna yango ata moke te, bomoni, ata moke te. Bomoni?

233 Azalaki koyanola na mituna oyo bango batunaki, kasi Asalelaki te—Asalelaki te—Asalelaki yango nyonso te mpo na mikolo ya nsuka. Alobaki: “Bokoyoka. . .” Sikawa tozali kolobela bobele likambo moko oyo awa. Tokomona makambo mosusu na mwa bampokwa oyo ekoya. Bótala. Alobaki: “Bokoyoka nsango ya bitumba, ná makeléle ya bitumba, mpe bongo na bongo. Na bongo, nyonso wana, ezali te. . . Bomoni, na nsima, bako—bakoya lisusu, na bongo, bakokaba bino, mpe

bongo na bongo ndenge wana. Mpe nyonso, nyonso wana ekokisami naino te.”

²³⁴ Kasi ntango Akómaki na ntango oyo Alingaki kosolola na bango na ntina na motuna oyo batunaki Ye, “nsuka ya mokili.”

²³⁵ “Makambo nyonso oyo ekosalema na ntango nini, ntango nini libanga moko te ekotikala likoló na libanga mosusu? Elembo nini ekotalisa yango? Mpe nsuka ya mokili ekosalema ntango nini?” Bomoni, batunaki Ye makambo misato.

Na bongo, ntango Akómaki na: “Nsuka ya mokili?”

²³⁶ Alobaki: “Ntango bokomona nzete ya mosúke kobimisa nkasa ya sika, bokoyeba ete ntango yango ekómi pene. Mpe solosolo Nalobi na bino ete ekeke yango ekoleka te liboso kino nyonso oyo ékokisama.” Bazangi-kondima, nákozanga ndimbola, balingaka kokangama na yango mingi! Bomoni? Alobaki: “Ekeke oyo,” ekeke oyo Azalaki kosolola na bango te, “ekeke oyo ekomona nzete ya mosúke kobimisa nkasa ya sika.”

²³⁷ Sikawa nalingi kotuna bino likambo moko. Bó—bótala likambo moko awa na miso mpenza. Mpo na mbala ya liboso, na mibu nkóto mibale na nkama mitano, Yisraele ekómi sikawa ekólo. Bendele ya kala koleka na mokili ezali kopepa likoló na Yelusaleme na mpokwa oyo. Yisraele ezali na mabelé na ye mpenza.

²³⁸ Ndeko moko azalaki awa mokolo moko, azalaki na mposa ya kokóma missionnaire, ayokaki mposa ya kokende lokola missionnaire epai ya Bayuda. Nalobaki: “Okoki kondimisa moko mbala na mbala.” Oh, bato bakanisaka ete bakondimisa ekólo mobimba! Te, misie.

²³⁹ Yisraele ekobóngwana lokola ekólo, lokola moto te. “Ekólo moko ekobótama na mokolo moko.” Ezali Yisraele. “Yisraele mobimba ekobikisama.” Bóbosana yango te. Polo moto alobaki bongo, ete: “Yisraele mobimba ekobikisama.” Sikawa bótala: “Yisraele mobimba.” Ezali mpenza bongo.

²⁴⁰ Sikawa bótala likambo oyo. “Kasi,” Alobaki, “ntango bokomona nzete ya mosúke, ná banzete mosusu nyonso, kobimisa nkasa na yango ya sika.” Sikawa bótala malamumu. Etikálá kozala na ntango moko te, na mibu nkóto mibale na nkama mitano, oyo Yisraele etikali koya na mabelé na ye. Tozali na mwa filme na yango, ya *Miniti Misato Liboso Na Minuit*, boyebi. Ye wana, ekólo, monzoto ya sóngé motoba ya Dawidi, ezali kopepa, ná makambo nyonso oyo.

²⁴¹ Etikálá kozala na ntango moko, oyo ba-dénomination bazuá kolamuka lokola oyo bazuaki na mwa mibu oyo eleki? Sikawa, bóyekola yango. Tozali epai na biso moko.

²⁴² Na ntango nini ba-dénomination batikálá kofuluka na nsé ya lotómo ya moto moko boye, ndenge bafuluki na oyo ya Billy Graham; Ba-Methodiste, ba-Batiste, mpe bongo na bongo?

Bólukaluka malamu na histoire, na ntango nini moto moko atikálá kokende na lingomba ya mimesano, oyo nkombo na ye esuki na h-a-m, liboso? Bómituna. A-b-e. . .

²⁴³ A-b-r-a-h-a-m. Sikawa bótala, nkombo ya Abraham ezali na nkoma nsambo, A-b-r-a-h-a-m.

²⁴⁴ Kasi mpo na Ndeko na biso Billy Graham, ezali G-r-a-h-a-m, motoba, nsambo te. Mokili, nde epai azali kosalaka mosala na ye, na lingomba ya mokili.

²⁴⁵ Lingomba ya mokili, ezalaki Lota, na Sodoma. Mpe ntango moto yango akendeke kuna koteya, abomaki bango miso na nzela ya Nsango-malamu.

²⁴⁶ Kasi Moko atikalaki elongo ná Abraham, mpe Abraham abengaki Ye “Elohim, Nkolo.” Sikawa ntango Abraham amonaki bato misato koya, alobaki: “Nkolo na Ngai.”

²⁴⁷ Ntango Lota amonaki bato mibale koya, alobaki: “Bankolo na ngai.” Yango nde bokeseni. Bomoni mosala ya bosato? Bomoni?

²⁴⁸ Yesu alobaki: “Ndenge ezalaki na mikolo na Lota.” Bomoni yango? Bótala. Bótanga yango.

²⁴⁹ Sikawa, Moko ayaki epai ya Lingomba ya Molimo, Mwasi na libala, Abraham, oyo azalaki na—na Sodoma te, mpo na kobanda. Mpe bótala eloko oyo Ye asalaki. Ateyaki ata moke te, lokola bango basalaki. Ateyaki bango, kasi na nsima basalaki bango elembo wana liboso na bango. Ye asalaki elembo ya Masiya. Apesaki mokongo na hema, mpe Alobaki: “Abraham.” Sikawa bómikanisela, nkombo na ye mpenza, mikolo moke liboso na yango, ezalaki Abram. Kasi Ye alobi: “Abraham, azali wapi mwasi na yo, S-a-r-a?” Mikolo moke liboso na yango, nkombo na ye ezalaki S-a-r-a-i.

Abraham alobaki: “Azali na kati ya hema, nsima na Yo.”

²⁵⁰ Mpe Alobaki: “Abraham, Ngai. . .” Likitana bomei eyei lisusu. “Nakoya kotala yo kokokana na elaka oyo Napesaki yo.” Bomoni eloko oyo esalemaki. Bomoni? Moto moko, ná putulú na bilamba na Ye, azalaki kolia mosuni ya mwana-ngombe, komela miliki ya ngombe, mpe kolia lipa ya masangu. Iyo, misie. Nzambe, Elohim, oyo atalisami na nzoto!

²⁵¹ Alakaki ete, na mikolo ya nsuka, komitalisa lisusu kati na nzoto! Bótala.

“Abraham, wapi mwasi na yo, Sara?”

“Azali na kati ya hema, nsima na Yo.”

Alobaki: “Nakoya kotala yo.”

²⁵² Mpe mwasi na ye, na ntembe te, lokola akómaki na mibu mokama, asekaki mwa moke na nse ya mongongo; azalaki na kati ya hema, nsima na ba-ridó, na kati ya hema. Alobaki: “Ngai, mwasi mobange boye.” Ee, bazalaki lisusu kobika lokola

mwasi ná mobali te, elekaki mibu ebele, boyebi, mpo ye mobali akómaki na mibu mokama, mpe—mpe—mpe mwasi akómaki na mibu ntuku libwa. Alobaki: “Ekosalema ata moke te.”

253 Mpe Alobaki: “Mpo na nini aseki?” Fiuu! Wana Apesaki mokongo na hema: “Mpo na nini aseki, kolobaka ete: ‘Ndenge nini makambo oyo ekoki kosalema?’” Bomoni, Alakisaki ye elembo moko.

254 Sikawa, Alakaki ete likambo yango ekosalema na ntango ya nsuka, lisusu.

255 Mpe bato mibale bakendeki kuna mpe bateyaki Liloba, mpe bayebisaki bango ete bábima kuna; ete mboka yango ekozika, mpe bongo na bongo. Mpe esalemaki. Mpe Lota atatabanaki; lingomba ya mokili, na kati ya lisumu, mpe na kati ya potopoto, kasi ata bongo, bazali naino kobunda-bunda na manaka na bango ya bibongiseli. Kasi Mwasi na libala . . .

256 Mobali moko wana atikálá kokende te epai na bango. Akendeki kaka kobenga elilingi ya Mwasi na libala. Sikawa tokómi na mikolo ya nsuka. Bomoni? Sikawa bótala.

“Olobaki kuna: ‘Nzambe, atalisamaki kati na nzoto?’”

257 Yesu Ye moko alobaki: “Ndenge nini bokoki kokweisa Ngai?” Alobaki: “Ekomami na Biblia na bino, mibeko na bino, ete bango, basakoli, baoyo Liloba na Nzambe eyaki epai na bango . . .” Yesu alobaki: “Liloba eyaki epai ya basakoli,” mpo Alongobanaki na Makomi na makambo nyonso. Alobaki: “Sikawa, Liloba na Nzambe elobi ete: ‘Liloba eyaki epai ya basakoli.’ Mpe bozalaki kobenga bango ‘ba-nzambe,’ mpo Liloba na Nzambe eyaki epai na bango.” Alobaki: “Na bongo, ndenge nini bokokweisa Ngai, ntango Nalobi ete Nazali Mwana na Nzambe?” Akangaki bango monoko, ná mobeko na bango moko. Yango mpenza. Bomoni?

258 Sikawa tokómi wapi? Tokómi na ntango ya nsuka. Sikawa bóyoka mpenza na bokebi.

259 Sikawa, tomoni ete bitumba ná makeléle ya bitumba ekozala. Sikawa tomoni ete nzete ya mosúke esili kobimisa nkasa ya sika. Banzete mosusu mpe ebimisi nkasa ya sika. Ba-Metodiste, ba-Batiste, ba-Presbiterien, ná bango nyonso, babimisi nkasa ya sika, kolamuka monene ezali kosalema.

260 Sikawa nandimi ete Nzambe azali kosangisa Mwasi na libala mpo na ngonga ya nsuka wana, Moponami. Oh, la la! Sikawa bótala.

261 Tótala sikawa likambo oyo Yoane amonaki, na ntango yango, makambo oyo amonaki. “Mpunda ya motane; mpe mobuti na yango akei, nguya epesameli ye mpo na koboma ná mopanga monene.” Sikawa emoniseli na ngai na ntina na yango, yango oyo. Oyo ezali lisusu Satana. Ezali lisusu zábolo, na lolenge mosusu. Sikawa, toyebi ete—ete Bilembo etalisaki . . . ndenge

nalobaki na mpokwa mosusu. Mpe bakelelo etalisaka bi—bi—bi—bitumba ya bato, bomoni, katikati na bato, katikati na bikólo. Kasi bomoni awa ete moto oyo azali na mopanga, na bongo, atalisi etumba ya politiki, ya lingomba. Sikawa, ntango mosusu bino bokoki kokanisa bongo te, kasi bólandela yango miniti moke, mwa miniti moke kaka.

²⁶² Bótala mbongwana ya langi ya bampunda oyo. Mobuti-mpunda moko wana; bampunda nde bazali kobongola lángi. Mpe mpunda ezali nyama. Mpe nyama, na Biblia, lokola elembetele, etalisaka nguya. Système yango moko ezali kobuta lángi mosusu, nguya, longwa na pembe oyo esali mabe te, kino na motane ya makila. Bomoni? Bótala ye sikawa ndenge azali koya.

²⁶³ Ntango abandaki liboso, azalaki kaka, ee, azalaki kaka mateyo moke kati na—na, katikati na bango, oyo ebéngami Bonikolaiti. Na ntembe te, elingaki koboma eloko moko te. Ezali Emoniseli 2:6, soki bolingi kokoma yango. Alingaki koboma eloko moko te. Ezali kaka mateyo, kaka molimo moko katikati na bato. Sikawa, alingaki koboma eloko moko te. Oh, azalaki mpenza na mabe te, wana abutaki likoló na mpunda ya pembe. “Ee, boyebi, tokoki kosala lingomba moko monene ya mokili mobimba. Tokoki kobenga yango lingomba ya mokili mobimba.” Bazali kosala bongo kino lelo. Malamu. Bomoni? Sikawa: “Tokoki kozala na. . .” Oh, ezali mpenza na mabe moko te. Mpe, oh, ezali mpenza na mabe moko te. “Ezali kaka etonga ya bato. Bisu nyonso tokosangana mpo na boyokani na bandeko.” Bomoni, ezali mpenza na mabe moko te; ezali pembe, mpunda ya pembe. Bomoni?

²⁶⁴ Ee, na bongo, bato na lokumu, ná bato oyo balataka malamau mpenza, ná baoyo batángá mingi, boyebi, mwa lokola bandeke ya ndenge moko, boyebi: “Toko—tokobongisa makambo na biso elongo. Mpe babola wana, ee, soki balingi kokoba kopotana, ee, malamau, kasi biso to—to—tokozua bato ya mosanda ya likoló koleka na losambo na biso. Soki tokoki komibenda, awa, toko—tokosala—tokosala etonga ya ba-Francis-maçon, to nyonso wana, boyebi. Toko—tokobongisa makambo mwa malamau koleka, to, ba-Oddfellow,” ndenge bazalaka. Na bongo. . . Club ya ba-Oddfellow te, kasi boyebi oyo nalingi koloba. Boye, ezali likambo ya ndenge, mpo na mondimi ya solosolo. Sikawa, kasi, na ndenge mosusu, na elobeli mosusu: “Tolingi kosala mwa etonga moko, mwa lisanga moko, oyo ekozala ya biso moko.” Ezali kaka mateyo, ezali na mabe moko te. “Bandeke, ee, toboyi bino te, ata moke te. Bozali mabe te, kasi, boyebi, tomoni ete—ete, tozali na mombongo mpe nyonso. . . Bisu, tokozala malamau mingi soki toanganaki mpenza kati na biso moko.” Bomoni? Ekóbaki ndenge wana, kino esalemaki, iyo, misie, basanganaki.

²⁶⁵ Kasi ntango molimo mabe ya kozimbisa wana (oh, la la!) elataki nzoto, molimo elati nzoto; molimo yango ya mateyo elataki nzoto, mpe ezuaki esika ya Klisto, na kati ya moto. Na

ntango yango, basengeli kokumbamela yango, ekómaki eloko ya kokumbamela, lokola Klisto. Na elobeli mosusu, kuna na Vatican . . . Nazalaki kuna mpenza. Ekomámá “VICARIVS FILII DEI,” mpe bakomá yango na mituya ya Baroma. Sikawa, bótia ndelo na nse ya mituya ya Baroma wana. Mpe elingi koloba: “Na esika ya Mwana na Nzambe.” Ye, na elobeli mosusu, azali mokitani. Boyebi oyo mokitani elakisaka; kozua esika ya eloko moko. Azali mokitani, “Na esika ya Mwana na Nzambe.”

²⁶⁶ Mpe Biblia elobi: “Tika ete ye oyo azali na likabo ya bwanya atánga motángo ya nyama, mpo ezali motángo ya moto. Mpe motángo na ye ezali nkama motoba na ntuku motoba na motoba.” Sikawa, bózua VICARIVS FILII DEI, mpe bótia ndelo, na mitángo ya Baroma; “V” ezali mitano, “I” ezali moko. . . Mpe bóbakisa yango, mpo bomona soki bokozua te nkama motoba na ntuku motoba na motoba.

²⁶⁷ Biblia elobi: “Akofanda kati na tempelo na Nzambe, bakokumbamela ye lokola Nzambe.” Ntango mwa mateyo yango elataki nzoto, ekómaki mokitani, “na esika ya Mwana na Nzambe.” Bomoni? Oh, la la! Molimo wana ya nsómo. ya kozimbisa! Soki bolingi kotánga yango, bótanga na Batesaloniki ya Mibale 2:3, mpe bokoki komona esika yango ezali.

²⁶⁸ Mpe, na ntembe te, bokomikanisela ete Satana azali mokonzi ya bokonzi nyonso ya politiki, na bikólo nyonso. Bato boni bayebi yango? Bolingi kokoma yango? Matai 4:8: “Satana amemaki Yesu likoló na ngomba molai, mpe atalisaki Ye makonzi nyonso ya mokili, oyo esiláká kozala to oyo ekozaláká, na mwa ntango moke.” Koloba na ntina na moto! Alobaki: “Nakopesa yo yango, soki okumbameli ngai.” Mpe Yesu ayebaki ete Ye akosángola yango.

²⁶⁹ Balobaka nde bongo: “Ee, bino etónga ya batúntuki!”

²⁷⁰ Ee, mokili ezali ya biso! “Basókemi bakosangola mabelé.” Oyo wana nde Yesu alobaki. Bomoni? Bomoni?

²⁷¹ Bótala, Yesu ayebaki ete Ye akosángola yango, na bongo, Alobaki: “Longwa awa, Satana. Ekomami,” azongaki mbala moko na Makomi, bomoni, “Okokumbamela Nkolo, mpe bobele Ye.” Bomoni?

²⁷² Sikawa—sikawa ntango—ntango ye, lokola molimo mabe mokonzi, alati nzoto kati na mosambeli oyo aleki monene, ndenge Biblia esakoli yango, na nsima, asangisi lingomba na ye ná letá. Banguya na ye nyonso mibale esangani elongo. Bomoni?

²⁷³ Ntango molimo ya motemeli-na-Klisto ebimaki, ezalaki molimo. Na nsima, ekómaki nini? Na nsima, ekómaki. . . Sikawa bótala Elembo yango malamumu. Ntango molimo ebimaki, ezalaki motemeli-na-Klisto, kotelemela malakisi ya Klisto. Malamumu. Likambo oyo elandi. . . Oyo Klisto abongisaki mpo na Lingomba na Ye, Ezalaki kotelemela lisumu. “Oh, Elingi koloba bongo te. Elingi koloba bongo te. Oyo wana ezalaki mpo na moto

mosusu. Oyo wana ezalaki mpo na ntango wana, eleki mibu mokama, kuna na ntango ya kala. Oyo wana ezali mpo na biso te.” Bomoni? Oyo wana, bomoni, *motemeli*, “kotelemela.” Na bongo ekómaki. . .

²⁷⁴ Sikawa, mobuti-mpunda abimaki, a—azalaki na motolé te, kasi motolé moko epesamelaki ye. Mpunda ya mpembe wana; azalaki na litimbo, ezángá mbanzi. Bomoni? Na bongo ntango abimaki. . .

²⁷⁵ Bongo, nsima na mwa ntango, apesamelaki motolé, mpo okoki kotia motolé likoló na motó ya molimo te. Kasi, ntango, molimo yango elataki nzoto na mosala ya mibale ya—ya eleko na ye ya kokamwa, na mosala ya mibale, akómaki mosakoli ya lokuta oyo alatisami motolé, mpo ásala mosala ya molimo ya motemeli-na-Klisto. Sikawa, tomoni ye kuna. Sikawa akómi bongo, ntango azui yango. Na bongo, asili kokóma bongo, Satana azali kokonza banguya ya politiki ya mokili.

²⁷⁶ Sikawa akómi na esika oyo akofandisa bokonzi ya lingomba na mokili mobimba, kozuáká nguya ya basambeli. Mpe bozali kososola te, bandeko na ngai, ete kati na. . . Ntango ekólo oyo emonani na mokapo ya 13 ya Emoniseli, mwa nyama yango etelemaki lokola mwana-mpate. Mpe ezali na maseke mibale, nguya etali bana-mboka ná ya lingomba, kasi asali makambo ndenge moko ná oyo nyama asalaki liboso na ye.

²⁷⁷ Kokamwa mpenza, Amerika ezali motángo ya zomi na misato, mpe ezali mwasi. Kokamwa mpenza, emonani ata na mokapo ya 13 ya Emoniseli. Tobandaki na mikolóto zomi na misato na bendele, minzoto zomi na misato. Nyonso ezali kaka “zomi na misato, zomi na misato, zomi na misato, zomi na misato,” kino na nsuka. Nyonso ezali kaka “mwasi, mwasi, mwasi,” kino na nsuka.

²⁷⁸ Sukasuka, ekosuka na, (nalobi yango liboso ésalema), mwasi moko akokóma mokonzi na yango. Bómikanisela, nalobaki yango eleki mibu ntuku misato. Mpe—mpe na ma—makambo nsambo oyo nalobaki liboso ésalema, mitano kati na yango esili kosalema. Mpe bazali na moto yango kuna mpenza sikawa mpo na kokótisa ye. Mpe bokótisi yango na vote, na nzela ya politiki na bino kuna. Iyo. Ha! Malamu.

²⁷⁹ Makambo ya koloba ezali mingi mpenza, tokoki kokóma mpenza te esika oyo tolingi kokóma. Bótala sikawa. Nakoumisa bino kaka mwa moke lisusu, soki nasengeli kokóba na yango lobi na mpokwa.

²⁸⁰ Bótala. Bóyoka. Ntango Satana. . . Sikawa, bato nyonso bayebi ete Satana azali na bokonzi likoló na banguya nyonso ya politiki ya mokili. Alobaki bongo. Matai mokapo ya 4, bososoli yango, molongo ya 8. Babokonzi nyonso ezali ya ye. Yango nde ntina oyo labundaka, basala bitumba, babomanaka. Sikawa, bobosana te.

281 Kokamwa mpenza, boye te? Bapesamaki mopanga oyo, mpo bábomana. Oh, oh, oh, la la! Bótala sikawa.

282 Sikawa, ntango asalaki bongo, azuaki naino nguya ya lingomba te. Kasi abandaki ná molimo mabe ya malakisi ya lokuta. Mpe malakisi yango ekómaki mateyo. Mateyo yango elataki nzoto na kati ya mosakoli ya lokuta.

283 Na bongo, akendeki mpenza na esika oyo esengeli. Akendeki ata moke te na Yisraele. Akendeki na Roma; Nicée, Roma.

284 Likita yango esalemaki, mpe baponaki episkopo mokonzi. Na bongo, na kosaláká bongo, basangisaki lingomba ná letá. Na bongo, atikaki litimbo na ye. Akitaki na mpunda na ye ya mpembe. Abutaki likoló na mpunda na ye ya motane, mpo akoki koboma moto nyonso azondimana ná ye te. Yango nde Elembo na bino. Moto moko wana! Bótala ndenge azali kokóba kokende kino na Seko na Seko kuna, ná yango, bomoni, asangisi banguya na ye nyonso mibale.

285 Likambo yango moko nde bazoluka kosala sika-sikawa, ndenge moko, lelo. Mpe likambo ya kokamwa, ntango mosusu bozali kososola yango te. Kasi, lelo, uta na etonga moko ya ba-Batiste na Louisville... Boyokaki yango na radio. Molobi moko atelemaki mpe... Bato boni bayokaki yango? Malamu. Bomoni? Malamu, yango mpenza. Balingi, mpe bakómi kosenga na lingomba sikawa ete “Tozali mpenza na ntina te, oh, ya kokota na lingomba, tóloba, kasi tosengeli, tóloba, kozala na bondeko ná bango.” Kozwa... Mpe, na ntango moko oyo yango ezali kosalema na Louisville, awa, Nzambe azali kofungola Bilembo mpo na bato na Ye, mpo na kotalisa yango: “Bósala yango te!” Bomoni ndenge bango mibale bazali kosala elongo? Bóbosana te ete eyánganga ná ebenga bafandaki likoló na efandelo moko, na kati ya masuwa. Na ntembe te. Bóbosana yango te.

286 Sikawa tomoni ete asangisi nguya na ye, na ntango wana, ntango akómi mbala moko letá mpe lingomba, nguya ya lingomba. Na bongo bokosala nini? Asali religion na ye moko. Sikawa akoki kosala nyonso oyo alingi. Na bongo, azali na makoki ya koboma moto nyonso oyo akondimana ná ye te. Yango mpenza nde eloko oyo asalaki mpe. Mpe asalaki yango mpenza. Mpe oyo ye—ye... Asalaki yango epai na basantu ya solo ya Nzambe na bomoi, baoyo batosaki Liloba mpe balingaki kondimana ná ye te na ntina na biyambweli na ye. Abomaki bango.

287 Sikawa, Ndeko Lee Vayle, ná bino balakisi ya makambo ya eleko ya Nicée ná lingomba ya ebandeli, nayebi te soki botángaki yango to te. Soki bolingi kotánga yango, bózua buku ya *Réforme ya Nkembo* oyo Schmucker akomá.

288 Bokomona yango, ete ntango Santu Augustin ya Hippone akómaki sánzó ya lingomba ya Roma, azuaki libaku malamú, na lolenge ete mokolo moko Molimo Mosanto amekaki koya

likoló na ye, kasi aboyaki Yango. Bato boni bayebi yango, bino balakisi? Boye, aboyaki Molimo Mosanto. Yango mpenza nde elilingi ya lingomba Protestant lelo, oyo eboyi Molimo Mosanto. Azongaki na Hippone, mpe ye nde moto oyo atiaki loboko na mokanda wana, mokanda oyo elobaki ete “Azuaki emoniseli uta na Nzambe, ete ezalaki mabe te mpe esepelisaki Nzambe ete báboma moto nyonso oyo akoboya kondimela lingomba Katoliko ya Roma.”

²⁸⁹ Sikawa báyoka. Nazali koloba likambo oyo uta na buku ya ba-martyre: “Kobanda na ntango ya—ya Santu Augustin ya Hippone kino na mobu 1586,” na buku ya ba-martyre ya Roma, “lingomba Katoliko ya Roma ebomaki ba-Protestant milió ntuku motoba na mwambe.” Mopanga na ye ezalaki nde motane? Azalaki nde kotambola na mpunda ya motane? Ezalaki nini? Nguya moko wana; mobuti-mpunda moko wana. Wana nde Elembo yango. Bandimaka ete “milió ntuku motoba na mwambe,” na buku ya ba-martyre, longólá baoyo nyonso babomamaki libanda na bango. Oh, mawa! Na bileko ya molili, bato milió na milió bapesamaki lokola bilei na bankosi, mpe babomamaki na ndenge nyonso, mpo baboyaki kotosa biyambweli wana ya Katoliko. Boyebi yango.

²⁹⁰ Botikali na ntango boni? [Losambo balobi: “Ntango mingi. Butu mobimba.”—Mok.] Malamu. Bótika ete nátánga likambo moko. Bózua elongo na ngai sikawa, bótika ete nálakisa bino likambo moko. Tó—tókanisa likambo yango, mwa moke. Euti koyela ngai na likanisi, mpe tokotánga yango kaka. Tózua Emoniseli, mokapo ya 17 ya Emoniseli. Totikali na miníti zomi na mitano. Malamu. Sikawa báyoka malamumu, malamumu mpenza sikawa, wana tozali kotánga. Bino baoyo bozali na ba-Biblia mpe bozali koluka, nakopesa bino mwa ntango moke, mpo bózua yango.

²⁹¹ Ozui yango, Lee? Namonaki yango na buku ya Schmucker, bomoni, *Réforme ya Nkembo*, ezuami mbala moko na buku ya ba-martyre ya Roma, na Vatican.

²⁹² Sikawa, esalemaki kobanda na minyoko ya bayekoli ya Santu Patrick. Nsima na yango babéngaka Santu Patrick mosantu na—na bango. Ha! Santu Patrick azalaki mpenza Mokatoliko, kaka mpenza lokola ngai; boyebi boni nazalaka yango. Bomoni? A—azalaki koyina mateyo ya lingomba. Azalaki koboya kokende epai ya pápa. Iyo, misie. Santu Patrick, ata. . . Ee, bosílá kokende na Irlande du Nord, esika biteyelo na ye ezalaki? Boyebi, nkombo na ye ezaláká Patrick te. Bato boni bayebi yango? Nkombo na ye ezaláká Sucat. Ya solo. Akufelaki leki na ye ya mwasi. Bozali komikanisela ntango bango. . . Bomoni? Malamu.

²⁹³ Sikawa bótala, mokapo ya 17 ya Emoniseli. Sikawa bino nyonso bómeka kofungola mitema na bino. Bótika ete Molimo

Mosanto áteya bino sikawa.

*. . . moko na banje yango nsambo ayaki epai na ngai,
baoyo bajalaki na—na mbeki yango nsambo, . . .*

294 Sikawa, bomoni, ezali na Mbeki Nsambo. Boyebi, bansambo yango, oyo tozali koyekola, nyonso ezali kosalema na ntango moko; kolandana na Malozi, kolandana na bileko ya lingomba, kaka ndenge moko, mpo nyonso wana ekangámi na kati ya Buku moko wana, nyonso. Mpe nyonso esalemaka moko nsima na mosusu; moko ekótaka na mosusu, ná mosusu, ná mosusu. Milimo mibale ezali kosala; Nzambe ná zabolo. Bomoni?

*. . . baoyo bajalaki na mbeki yango nsambo ya nsuka,
ayei kosolola na ngai ete . . . Yaka awa; nakotalisa yo . . .
na yo ekateli ekatameli mwasi monene na pité, oyo
afandi likoló na mai mingi:*

295 Sikawa bótala awa, awa boye, ete, “mai.”

296 “Mwasi na pite,” ezali nini? Ezali mwasi. Ekoki kozala mobali te. Mpe mwasi atalisaka nini na lingomba, na Biblia? Lingomba. Mpo na nini? Mwasi na libala ya Klisto, mpe bongo na bongo; bomoni, ezali mwasi, lingomba.

297 Sikawa: “mai,” elingi koloba eloko nini? Bótala malamau awa. Bótanga molongo na yango ya 15 kuna.

*Alobaki na ngai mpe ete, Mai namonaki yo, kuna
efandi mwasi na pité, majali mabota, . . . bibelé, . . .
bikólo, ná minoko.*

298 Lingomba yango ezalaki kokonza mokili mobimba, bomoni: “Efandaki likoló na mai ebele.”

*Oyo bakonji na mokili basali ná ye pité, pité ya
molimo (bazalaki kondima mateyo na ye, mateyo ya
Banikolaiti), mpe bafánda na mokili balángwi vinyo na
pité na ye.*

299 Oh, bato ebele balángwi na yango! Bino . . .

*Akambi ngai kati na molimo kuna na lisobe: mpe
namoni mwasi. . .*

300 Mpe boyebaki nini? Mikanda ya Bakatoliko bango moko endimaka ete yango ezali lingomba na bango. Bato boni bayebi yango? Na mikanda na bango moko. Nazali na buku ya *Bosolo Ya Kondima Na Biso*, babengaka yango bongo, bomoni; ezali ya sángo moko. Malamau. Malamau.

*Mpe akambi ngai kati na molimo kuna na lisobe:
namoni mwasi afandi na nyama oyo alati motane, oyo
atondi na nkombo na kotúka, oyo mpe azalaki na mító
nsambo ná maseke zomi.*

301 Sikawa bótala yango malamau, elembetele yango, “mitó nsambo” yango. Sikawa, bomoni awa, epai Elobaki: “Mpe—mpe—mpe. . . Mító oyo omoni ezali ngomba nsambo oyo mwasi

yango afandi likoló na yango.” Roma efandi likoló na ngomba nsambo. Bomoni? Sikawa, ezali ata na libunga moko te na ntina na yango, bomoni: “Mitó nsambo.” “Mpe maseke zomi,” boyebi, ezali bokonzi zomi, mpe bongo na bongo.

Mwasi alati bilamba motane moindo... motane mondo, ... akembisi njoto na wolo, na mabanga kitoko... mangaliti, mpe ajalaki na kopo na wolo na loboko na ye etondaki na bosoto—bosoto ya mbindo ya pité na ye:

³⁰² Molimo wana ya motemeli-na-Klisto, “pité,” bomoni, “malakisi,” kosaláká ekobo kotelemela Nzambe. Bomoni? Sikawa, asengelaki kozala Mwasi na libala, bomoni; kasi azali kosala ekobo. Bomoni? Kaka ndenge Eva asalaki, kaka ndenge lingomba esali kuna. Bomoni?

Na motó na ye ekomamaki, nkombo moko ekomamaki ete, LIBOMBAMI, BABELE MONENE, . . .

³⁰³ Mpe moto nyonso ayebi ete: “BABELE” ezali Roma.

. . . MAMA NA BASI YA NDUMBA NÁ BOSOTO NA MOKILI.

³⁰⁴ Mpe bóyoka molongo ya 6.

namonaki ye mwasi alángwi na makila na bapetwi, mpe na makila na batatoli na Yesu: wana emoni ngai ye, nakámwi na kokamwa monene.

³⁰⁵ Azalaki mwasi ya kitoko mingi, ná bikulusu mpe biloko mosusu na nzoto na ye! “Ndenge nini akokaki kokweya na likambo ya komela makila ya basantu?” Etungisaki ye. Sikawa Alingi koyebisa ye yango.

Mwanje alobaki na ngai ete, Okamwi mpo na nini? Ngai nakoyebisa yo libombami ya mwasi yango ná . . . nyama oyo amemaki ye, . . .

³⁰⁶ Sikawa, oyo ezali na kati ya moko na Bilembo te. Oyo ezali eloko mosusu, bomoni.

Mpe alobaki . . . mitó nsambo mpe maseke zomi.

Nyama . . . oyo omonaki ajalaki nde ajali te; mpe abele mi kobima na libulu bojindo (oyo ezangi mobóko, pápa), mpe akokende kino na libebi: bafandi na mokili bakokamwa, baoyo nkombo na bango ijangi kokomama na buku na bomoi na Mwana-mpate, (bango nde baponami, bomoni), bomoi longwa na bojalisi na mokili, . . .

³⁰⁷ Ndenge nini, ntango nini nkombo na yo ekomamaki na Buku ya Bomoi? Na mayangani ya kolamuka oyo okendeki? Te, misie. “Longwa na kozalisama ya mokili.”

. . . bakokamwa wana ekotala bango nyama oyo ajalaki, . . . ajali te, mpe akoya.

308 Bomoni, “nyama,” moko akufi, mosusu azui esika na ye. “Azalaki; azalaki lisusu te. Azalaki; azalaki lisusu te. Azalaki; azalaki lisusu te.” Mpe akokende mbala moko kino na libebi, ndenge wana. Bomoni? Malamu.

Awa ebongi na—awa ebongi na makanisi oyo ezali na bwanya.

309 Bato boni bayebi ete makabo ya molimo ezali libwa, mpe moko na yango ezali bwanya? Malamu.

Mitó yango nsambo mijali ngomba nsambo, kuna efandi mwasi likoló na yango.

310 Oh, osengeli kozala mokufi-miso na mobimba, bába mpenza, mpo na kozanga kososola yango. Bomoni? Malamu.

Mijali...bakonzi nsambo: mitano basili kokweya, moko ajali (Neron), mpe...mosusu ayei naino te; mpe ntango akoya, ye akosengela koumela mwa ntango moke.

311 Bozali komikanisela eloko oyo asalaki. Apelisaki móto na engumba mpe alobaki ete Baklisto nde basalaki yango. Atindaki ete bákanga mama na ye na libaya oyo esangisaka mpunda ná likalo mpe batambwisaki ye ndenge wana na babalabala. Mpe azalaki kobeta nzenze, wana Roma ezalaki kozika. Malamu.

Nyama oyo ajalaki mpe ajali te, ye ajali oyo na mwambe,...

312 Roma ya bopakano, ekómaki Roma ya bopápa. Ntango molimo ya motemeli-na-Klisto elataki nzoto, mpe elatisamaki motolé, akómaki mokonzi ya Roma oyo alati motolé, ná letá ná lingomba, elongo. Oh, ndeko! Bomoni, nkasa mingi etondi na yango. Bomoni?

...ajali...oyo ya nsambo, mpe akei na ye... (Akoumela ntango boni? Babongolaka ata moke système yango)...kino libebi.

...maseke jomi oyo omonaki majali bakonji jomi, baoyo bajui naino te bokonzi ya bakonzi; kasi bakojuu bakonji lokola bakonji ná nyama elongo ngonga moko.

313 Oyo wana ezali ba-dictateur, bomoni, ya solo mpenza. “Bazali na likanisi moko.” Sikawa, bótala awa. Mpe balobaka na ntina na communisme. Bomoni?

Bango bajali na likanisi moko, mpe bakopesa nyama nyuya na bango, ná bokonji na bango.

Bango bakobunda etumba ná Mwana na mpate, mpe Mwana na mpate akolonga bango: mpo ajali Nkolo na nkolo, mpe Mokonji na bankonji: mpe baoyo bajali elongo ná ye babiangani, ...baponami, mpe basémbo.

Mpe ye alobaki na ngai mpe ete: Mai mamonaki yo, kuna efandi mwasi na pité, majali mabota, . . . bibebe, . . . bikólo, mpe minoko.

. . . maseke jomi mamonaki yo likoló na nyama, bango bakoyina mwasi na pité, mpe boyokani yango ebulanaki. . . (Nalobelaki yango lobi na mpokwa). . . bakobebisa ye, mpe bakojalisa ye bolumbu, bakolia mosuni na ye, mpe bakotumba ye na móto.

314 Boyebi te ete Biblia elobi ete bakumbi masuwa, ná bamosusu nyonso, balobaki: “Mawa, mawa na engumba monene wana! Ete ebebisamaki na ngonga moko!” Bomoni?

Mpo ete Nzambe asili atiaki na mitema na bango ete basala mokano na ye, mpe bándimana na kopesa nyama babokonzi na bango, kino liloba na Nzambe ekokokisama.

. . . mwasi, oyo omonaki, ajali engumba yango monene oyo ajali na bokonji likoló na bakonji nyonso na mokili.

315 Boyebisa ngai moko mpamba. Russie ezali na bokonzi likoló na nyonso te. Bisó tozali na bokonzi likoló na nyonso te. Ezali na mokonzi kaka bobele moko, oyo azali kokonza likoló na nyonso. . . lokola ebende ya Nebukadanesala wana oyo ezalaki na misapi nyonso ya makolo. Ezali Roma. Roma esalaka yango lokola ekólo te; esalaka yango lokola lingomba. Bikólo nyonso na nsé na moi ekonzami na Roma.

316 Kokamwa te ete balobaki: “Nani akoki kobunda ná ye?” Akoki koloba: “Kimia,” [Ndeko Branham alélisi misapi na ye—Mok.] mpe ekati likambo. Bakatoliko nyonso bakoloba: “Ezali bongo: ‘Bóbunda te,’” mpe—mpe bakobunda te. Esili. “Nani azali na makoki ya kosala oyo ye akoki kosala?” Moto moko te. Ezali solo. “Boye bazali kokamwa bikamwa oyo akoki kosala.” Akoki kotelemisa etumba. [Ndeko Branham alélisi misapi na ye.] Eloko bobele moko oyo asengeli kosala ezali bobele ete áloba: “Bótika.” Esili wana. Kasi bokanisi ete akosala yango? Ata moke te.

317 Bótala, wana etalisi mpenza ete: “Basengeli kobomana. Basengeli kobomana bango na bango.” Litimbo na ye ezángaki mbanzi, na ebandeli, kasi “mopanga monene” na ye, esalaki yango. Abomaki mpenza bato, nsima na yango, mpe atikaki mpunda ya mpembe mpe abutaki na mpunda ya motane; zaboló moko wana mpenza, ná mopanga na ye.

318 Yesu alobaki nini? Yesu alobaki: “Baoyo bakozua mopanga bakokufa na yango.” Bino bósala bitumba te. Bomoni? Yesu, na butu wana ntango Alobaki, ntango Alobaki likambo yango, Petelo azuaki mopanga na ye. Bomoni? Bino bósala kaka ndenge Ye asalaki, bókende kaka liboso.

319 Sikawa, sikawa bómikanisela, azali na mopanga. Azali kokende, asimbi mopanga na loboko; abuti mpunda ya motane, azali kopotana na makila ya bato nyonso oyo baboyi kondimela ye.

320 Sikawa bosósoli yango? [Losambo balobi: “Amen.”—Mok.] Bato boni basosoli oyo Elembo yango ezali sikawa? [“Amen.”] Malamu. Sikawa, Yesu alobaki nini? “Baoyo bakozua mopanga bakokufa na mopanga.” Ezali bongo? Malamu. Malamu. Mobuti-mpunda oyo, ná bato nyonso ya bokonzi na ye, oyo bazali koboma bato kati na bileko nyonso, oyo bazali kosopa makila nyonso oyo ya ba-martyre, ya basantu, bakobomama na Mopanga ya Yesu Klisto, ntango Akoya. “Baoyo bakozua mopanga bakobomama na mopanga.” Bango bazuaki mopanga ya biyambweli ná motemeli-na-Klisto, mpe babomaki bamilió ya basámbeli mpenza ya solosolo, ee, kati na bileko nyonso. Ntango Klisto akoya ná Mopanga, mpo yango ezali Liloba na Ye, oyo ebimaka na monoko na Ye, Akoboma monguna nyonso oyo azali liboso na Ye. Bondimi yango? “Akoboma monguna.”

321 Tózua yango mwa moke, na Emoniseli. Tokomona sikawa soki ngai moko nde nazali koloba yango, to Liloba nde elobi yango. Emoniseli 19:11.

Namonaki likoló esili kojipwa (amen), mpunda ya mpembe ajalaki, mofandi likoló na ye abiangami Sémbó ná Sólo, mpe akosambisaka mpe akobunaka etumba na boyengebene.

Miso na ye . . . bipeleli na móto, mpe na motó na ye . . . mitole na bokonji mingi; . . .

322 Oh, ndeko! Bomoni, Basantu na Ye basili kolatisa Ye motolé, bomoni.

. . . ajalaki na nkombo esili kokomama, oyo moto mosusu ayebaki te, bobele . . . ye moko.

323 Bómikanisela, biso to—tokoki te, toyebi yango te, bomoni, nkombo yango. “Mpe alátaki elamba . . .” Tótala.

Alátaki elamba esili koyinama na makila: mpe nkombo na ye ebiangami ete (“ezali” te, kasi “ebiangami”) Liloba na Nzambe.

324 Mpamba te, Ye ná Liloba bazali eloko moko. Bomoni? Sikawa bótala, ezali te “bankombo na Ye.” Ah-ah! “Nkombo na Ye ebengami ‘Liloba na Nzambe.’” Ayebi bobele Nkombo moko; nkombo mosusu te.

Bibele na babundi ya likoló bajalaki kobila ye, bafandi na bampunda mpembe, balati bilamba petepete, mpembe, peto. (Ezali boyengebene ya basantu. Bomoni?)

325 Sikawa bótala malamumu. Yesu alobaki nini? “Ye oyo akozua mopanga . . .” Malamu, mobuti-mpunda ya motane, bótala ndenge nsuka na ye ekozala. “Ye oyo akozua mopanga . . .”

Okokaki koboma bango milió ntuku motoba na mwambe, na kati ya bileko, kobanda wana; ntango mosusu koleka. Kasi Yesu alobaki: “Ye oyo akozua mopanga akokufa na yango.” Bótala malamau.

Na monoko na ye mopanga na mopotu ebimi, . . .

³²⁶ Baebete, mokapo ya 4, elobi: “Liloba na Nzambe ezali na mopotú koleka mopanga ya mino mibale, ekátaka ata kino na kokabola mafuta na mokuwa.” Mpe Yango, Liloba, esalaka nini? “Esósolaka makanisi ya motema.” Ya solo.

*. . . na monoko na ye mopanga na mino mibale . . .
ebimi, mopanga na mopotu, na ntina ete ábola bikólo
nyonso: ye akokengela bango na mpimbo na ebende:
ye akonyata ekámelo na vinyo na kongala na nkele na
Njambe Mojui-na-Nguya-nyonso.*

*Na elamba na ye mpe na ebelo na ye azalaki na nkombo
ekomami ete, MOKONJI NA MOKONZI, MPE NKOLO
NA BANKOLO.*

³²⁷ Ndenge bakósi batelemelaki Liloba na Nzambe, mpe lokola bazalaki kondimela ye te, mpe likambo yango . . . Satana atiaki, asangisaki banguya ya politiki, oyo azalaki na yango, ná banguya ya molimo, oyo azalaki na yango, elongo, mpe asalaki lingomba oyo ekoti na kati ya ekólo nyonso. Mpe asili koboma bato milió na milió . . . nsima na ye kokita na mpunda ya mpembe mpe kobuta na mpunda ya motane, azuaki mopanga na ye mpe akendekei.

³²⁸ Kasi Nzambe alobaki: “Na Eloko yango moko oyo abebisaki, to amekaki kobebisa, na nzela ya malakisi ya lokuta; Liloba yango moko ekotelema na nguya, uta na bibebu ya Yesu Klisto, ekoboma ye, ná nyonso oyo ezali liboso na Ye.” Amen.

³²⁹ Yango nde Elembo ya Mibale. Bolingi Ye? Oh, la la! Wana ezali YANGO ELOBI NKOLO. Nkembo na Nzambe! Soki bimoniseli nyonso mosusu oyo, ná bimononeli, mpe nyonso, epesi mpenza—mpenza ndenge esengeli! Bato boni bayebi yango? Bótombola maboko. Bato nkama na nkama, bato nyonso awa, batomboli maboko. Ya solo. Oyo mpe ekozala bongo! Bóbosana te, ezali bongo.

Oh, moninga, yaka na Liziba oyo etondi na
Makila,
Oyo euti na misisa ya Emanuele,
Esika basumuki oyo bamibwakaka kati na
yango,
Mbindo nyonso ya mabe na bango elongwaka.

³³⁰ Boya, bondimela Ye, soki bosali yango naino te. Komekameka te; te, te, soki eloko moko ezali na bomoi na yo, moninga.

³³¹ Tokómi wana. Likambo moko elingi kosalema. Nayebi te mpo na nini. Nayebi te ntango nini. Nayebi eloko oyo ekosalema,

kasi nayebi te ntango nini ekosalema. Kasi esengeli kosalema, mpo Azali komonisa yango sikasikawa. Asalaka eloko moko te soki Amonisi yango te. Aмоса 3. Amonisaki yango liboso. Mpe Alakaki ete makambo oyo ekoya na mikolo ya nsuka. Mpe bileko nsambo ya lingomba, na nsuka na yango, ntango motindami akosila koya, ekosalema ntango wana. Ekomonisama, Bilembo oyo efungwami ekomonisama, mpe Yango oyo. Sikawa, ezali na Nkombo na Nkolo. Ndimá Yango, moninga. Iyo, misie. Bimá na Babilone!

³³² Nalingi koloba likambo moko liboso ya kosilisa. Mpamba te, nazali na . . . ngonga ya libwa na ndambo elingi kokoka. Ntango yango ekoki sikawa.

³³³ Billy ná ngai, ntango tokitaki na mpepo, na Inde, na mobembo ya nsuka oyo tokendeki kuna. Nazalaki kotala zu—zulunále moko oyo bayaki na yango, ekomamaki na Anglais. Bakomaki: “Na ntembe te, koningana ya mabelé esili; bandeke babandi kozonga awa.” Na nsima, bakomaki yango na bolai. Bango. . . Likambo moko ya ndenge mpenza eutaki kosalema.

³³⁴ Na Inde batongaka bitutu ya lopango na kiyungulu te, lokola biso. Bango balokotaka mabanga, mpo na kotonga bitutu ya lopangpo. Mpe batongaka bandako na bango mingi na mabanga, batiaka yango kaka wana. Mpe molunge ezalaka makasi kuna, mpembeni na, oh, bisika nyonso, tóloba, na Inde, longola kaka soki ozalaka likoló na bangomba. Mpe na Calcutta mobimba mpe zinga-zinga, bato batandamaka na babalabala, bakufaka na nzala, mpe bongo na bongo.

³³⁵ Sikawa, na bongo, batongaka bandako na bango, emataka likoló, bandako na bango. Batongaka etútu ya—ya lopango pembeni na ndako mpenza. Bandako na bango emataka likoló, mpe ndako yango ekoki kozala esika oyo libulu na bango ya mai ezalaka. Batimolaka yango mpo na bibwele na bango ná nyonso wana, na nsima, batongaka bitutu na bango ya lopango.

³³⁶ Mpe, na mbala moko, eloko moko ebandaki kosalema. Bandeke ya mike, boyebi, bakótaka na kati ya mabanga yango, mpe batongaka bazála na bango mpo na kobokola bana na bango. Mpe likambo moko ebandaki kosalema.

³³⁷ Mikolo nyonso, ntango molunge ebandaka, bibwele nyonso bapusanaka pembeni mpo na kotelema na nse ya elilingi ya bitutu yango; mpo na kozala na mpio.

³³⁸ Mpe bandeke nyonso ya mike efandaka na kati ya bisika wana. Mpe, na mbala moko, bandeke mike nyonso wana, na ntina moko oyo eyebani te. . . Sikawa, boyebi ndenge tolobaki mokolo wana, na ntina na bandeke ya mike. Bomoni? Na ntina moko oyo eyebani te, bango nyonso bapumbwaki. Babimaki, mpe bazongaki na bazála na bango te. Bakendeki na elanga, bafandaki na banzete, ná bisika nyonso oyo bakokaki kofanda, to kaka na mabelé.

339 Bibwele eboyaki kopusana zinga-zinga. Bampate baboyaki kopusana zinga-zinga. Batikalaki kaka na elanga, mpe bakanganaki bamoko na bamosusu. Yango nde lolenge malamumu ya kosala. Bayebaki ete likambo moko elingaki kosalema.

340 Nsima na yango, na mbala moko, mabelé eninganaki, mpe ekweisaki bitutu yango, bitutu ya lopango ná biloko mosusu nyonso.

341 Nsima na yango, bandeke ya mike babandaki kozonga. Bazongaki te, liboso na mikolo misato to minei; nsima na yango nde babandaki kozonga. Balobaki: “Ee, na ntembe te, koningana ya mabelé esili sikawa; bandeke bazali kozonga.”

342 Mpo na nini? Bondimaka te ete Nzambe moko oyo asalaki ete bandeke, bibwele ná bampate wana, na mikolo ya Noa, bákota na masuwa, Azali Nzambe yango moko kino lelo, oyo akoki kosala ete bákima mpo na komibatela? Ezali bongo?

343 Sikawa tika ete náloba likambo moko, ndeko. Likambo moko elingi kosalema. Mpe bitutu nyonso ya minene ná ya kala wana, ya mangomba, ekokweya, bakozonga kuna mpe bakoyókana. Mpamba te, bakosala yango, ya solo mpenza, kaka ndenge natelemi awa. “Elilingi mpo na nyama yango” ezali, ya solo mpenza, kaka ndenge natelemi awa; mpe ekólo oyo esili kozua yango, kokokana na Liloba na Nkolo. Bóyoka, ntango omiyoki mwa komiyoka wana ya ndenge, kende mosika na bitutu yango. Kima na yo! Okokufa, soki otikali kuna na kati. Kosala bongo te! Bima kuna! Kende mosika na biloko nyonso wana! Kima na esika ya komibatela, na lombangu na yo nyonso. Sénga na Nzambe ete áyokela yo mawa.

344 Kosuka kaka te koloba: “Ee, mama na ngai azalaki Metodiste, boye, nabanzi ete ngai mpe nakozala Metodiste. Papa na ngai azalaki Batiste; ngai mpe nakozala Batiste.” Komeka kosala bongo te. Komeka te—komekameka te.

345 Ata Emonani pete mpe na komikitisa ndenge nini; Ezali Liloba ya Nkolo. Kima epai na Yesu Klisto na lombangu na yo nyonso, mpe tikala kuna kino Nzambe átondisa yo na Molimo Mosanto na Ye. Mpamba te, ntango moko ekoya, oyo bokoluka Yango, kasi Ekozala lisusu wana te. Boye, ndimisama mpenza kosala yango.

Tógumba mitó, mwa moke.

346 Tata na Likoló, oh, mbala mosusu, Nkolo, na—natelemaka awa mpe—mpe naléngaka. Nakanisi ntango ya nsómo oyo ezali kobelemama, mpe na . . . Nzela ya kopekisa yango ezali te. Esilá kosakolama ete ekoya. Mpe namitunaka: “Mpo na nini bato baboyaka ko—ko—koya koyoka? Mpe mpo na nini baboyaka koya koyamba Yango?” Kasi, ya solo mpenza, nayebi ete—ete O—Olobaki ete bakosala yango te, boye, bakosala yango te.

347 Kasi bamosusu bazali kuna, oyo bankombo na bango ekomámá na Buku ya Bomoí ya Mwana-mpate. Mpe wana Bilembo yango ezali kofungwama boye, bazali komona nkombo na bango kuna, mpe Molimo Mosantu azali kosolola na bango. Bazali koya. Okoki kopekisa bango koya te; moto moko te akoki kopekisa bango, moto moko te. Bazali koya, ata bongo, mpo Ozali kokamba bango ndenge Okambaki mwa bandeke wana, ná bampate ná bibwele. Ozali Nzambe! Banyama yango bazali na mwa mayele moke oyo esalaka ete báyeba ete basengeli kokima! Soki mwa mayele yango, na nyama, ekokaki kokebisa ye mpo ákima likama, eloko nini Molimo Mosanto esengeli kosala na Lingomba oyo elobaka ete etondisami na Yango!

348 E Nzambe, yokela biso mawa. Limbisa biso nyonso, Nkolo, mabe na biso. Ezali mposa na biso te, kotelema awa na eteyelo oyo, mpe kotika ete bato bátelema pembeni na bitutu, wana makolo ezali kosala mpasi, mpe nsima na yango bázonga mpe báloba: “Ee, eyokani kitoko mpenza.” Nkolo, tolingi kosala likambo moko na ntina na yango. Bisó, biso tolingi ete Ólukaluka kati na mitema na biso. Soki eloko moko ezali kotambola malamú te, Nkolo, yebisa biso yango sikawa. Tolombi Yo ete ótika te ete tókóma na ngonga yango, kuna, ntango ekosila koleka. Lukaluka kati na ngai. Meka ngai, Nkolo.

349 Awa, natelemi awa na ngolu na Nzambe, namonaki Bilembo yango kofungwama kuna, mpe nayeí, nazali koyebisa bato. Nzokande, eleki bampóso, Olobaki yango liboso, ete ekosalema boye. Sikawa, Tata, Yango oyo, liboso na biso mpenza.

350 Sikawa, Nkolo, meká ngai. Lukaluka kati na ngai. Lukaluka kati na ngai, na motema na ngai. Nkolo, to . . . Bisó, biso tolingi ete Ólukaluka kati na bomoi na biso. Mpe soki eloko moko ezali kuna, oyo ezali malamú te, yebisa biso yango, Nkolo. Tolingi kobongisa yango mpenza, sika-sikawa; sika-sikawa, wana Liziba oyo etondi na Makila ezali, wana javel e—ezali, oyo ekoki kopetola masumu ná kozanga kondima na biso. Tolingi kokótisa milimo na biso na kati na yango; kozanga kondima na biso nyonso. E Nzambe, sunga kozanga kondima na biso; longóla yango na kati na biso, Nkolo.

351 Tolingi koyamba ngolu ya konétolama. Tolingi kozala na makoki, ntango Nkake ya kokamwa wana ekonguluma kuna, mpe Lingomba ekonétolama, tolingi komilengela mpo na koyamba Yango. Nkolo, kokisa yango.

352 Meka biso, Nkolo, na Liloba na Yo. Sala ete tóyekola Yango.

353 Mpe soki tomoni ete tokweyaki, soki bato bazali awa, Nkolo, oyo babátisamaki na bibiangelo, mpo bayebaki eloko moko te na ntina na libatísi ya solosolo, sala ete názala sembo lokola Polo, ntango alekaki na bituka ya likoló na Efese, amonaki bayekoli oyo bazalaki kobeta milólo, kogánga, mpe kolekisa ntango ya

nkembo, alobaki na bango: “Bosila koyamba Molimo Mosanto, na ntango wana, uta bondimáki?”

Bayebaki ata te ete Ezalaka.

Alobaki: “Bongo, bozuaki libatisi ya nini, kasi?”

Basiláká kobatisama na mosakoli mosantu ya nkembo wana, kasi babátisamáká kaka mpo na kobongola motema.

³⁵⁴ Nsima na yango babatisamaki lisusu, na Nkombo na Yesu Klisto. Paulo moto apesaki bango motindo ete bábatisama lisusu.

³⁵⁵ Nkolo, na Pole ya Liloba na Yo: Napesi motindo na moto nyonso, oyo abatisami na Nkombo na Nkolo Yesu Klisto te, ete áya nokinoki na máí, nokinoki, wana bozui libaku malamú. Bino baoyo botóndisami te na Molimo Mosanto, Napesi bino motindo, na Nkombo na Nkolo Yesu Klisto, ete bókweya na mabolongo na bino, mpe bótelema te, kino Molimo Mosanto akobulisa bino na mobimba, mpe akotondisa bino na bolingo mpe boboto na Ye, kino elimo na bino ekosilisa mposa na yango, Liboso na Nzambe, na lolenge ete mposa na bino mobimba ekokóma ya kosalela Ye, kotambola mpo na Ye, mpe kosala elongo na Ye, na bomoi na bino mobimba.

³⁵⁶ Kokisa yango. Nabondeli ete Nzambe ápesa bino mokumba yango, na Nkombo na Yesu Klisto.

Nalingi Ye, nalingi Ye
Mpo Alingaki ngai liboso

Bolingaka Ye mpenza? Sikawa, bótombola maboko.

Mpe Asombaki lobiko na ngai
Likoló na Ekulusu.

³⁵⁷ Soki moto moko afandi awa, oyo ayoki bosenga na ye na mpokwa oyo, oyo ayoki ete asengeli kobatisama, to oyo asengeli na libatisi ya Molimo Mosanto. Oyebi bosenga na yo; emonisameli yo, mpe olingi ete tókanisa yo na libondeli. Moto moko te kati na biso akoki kopesa yo Yango. Oh, biso tokoki kobatisa yo. Kasi, likambo bobele moko ezali ete, tokoki kopesa yo Molimo Mosanto te. Nzambe Ye moko nde apesaka Yango. Kasi oyoki bosenga na yo, ete Nzambe azali kosolola na motema na yo, ete osengeli na Yango, mpe olingi ete tókanisa yo na libondeli. Okoki kotelema, mpo tóyeba yo, tóyeba nani yo ozali? Nzambe ápambola yo. Bosenga? Nkolo ápambola yo.


³⁵⁸ Nabanzi ete bato nkama na ntuku mitano, ntango mosusu, batelemi awa. Ntango mosusu ezali bongo, soki nakoki komona bango nyonso. Nayebi te bato boni bazali kati na biteni ya ndako, mpe na libanda, baoyo batomboli maboko, mpe bongo na bongo. Kasi bozali na bosenga.

Sikawa tóbondela.

³⁵⁹ Sikawa, bino baoyo bozali komona bato oyo batelemi pembeni na bino. Mpe batelemi lokola litatoli, liboso na Klisto: “Na—na—nasengeli na Yo, Nkolo. Nasengeli na Yo. Na—natii motema ete nazali—nazali moko na baoyo bakomona nkombo na bango na mpokwa oyo, nsima na Elembo yango kuna, ekomamaki Kuna liboso na kozalisama ya mokili. Eloko moko ebeti motema na ngai, mpe natelemi, Nkolo. Ezali nde ngai? Ozali kobenga ngai? Nalingi ete Ómonisa ngai, nkombo na ngai Kuna. Tondisa ngai, mpe tia ngai elembo na kati na Yo moko, na nzela ya Molimo Mosanto.” Bino baoyo bosilá kotiyama elembo na kati, nalingi ete bótelema. Bóbaluka epai na bango, mpe bótiela bango maboko, mpo na kobóndela mpo na bango. Sikawa bózála na bosembo mpenza.

³⁶⁰ Tata na Likoló, na Nkombo na Nkolo Yesu, tika ete Molimo Mosanto ya nkembo áya likoló na eyanganelo oyo, lokola mopepe makasi, mpe ábenga motema moko na moko awa, Nkolo. Mpe kitisa libatisi ya Molimo Mosanto, likoló na bato oyo.

Mpe mai ezali kozela bango.

³⁶¹ “Wana Petelo azalaki naino koloba maloba yango, Molimo Mosanto akitaki likolo na baoyo bazalaki koyoka Liloba, mpe bango nyonso batondisamaki na Molimo Mosanto.” 

63-0319 Elembo Ya Mibale
Branham Tabernacle
Jeffersonville, Indiana U.S.A.

LINGALA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotíama na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org